

皇帝動駕北征○六月甲辰朔賜讓寧大君燒酒及內羞○命還給官
者金富尹德仁職牒○禮曹啓今使臣以乾魚物貿易委來請令咸吉
江原等道乾鯁魚大口魚文魚古道魚各色海菜等物及時預備又春節
已備乾魚勿於他處費用從之○丙午慶尚道鑄錢別監白環進新鑄
錢二十貫○丁未召領議政柳廷顯星山府院君李稷左議政李原大
提學卞季良吏曹判書許稠禮曹參判李明德使知申事郭存中傳教
曰今觀禮曹所上 祔廟儀註當 祔廟日於 廣孝殿奉出 太宗
王后兩位神主時即行奠禮安位板子惟 祔廟之日其重專在 祔
廟而欲以考妣之神先安於 原廟然後次行 祔廟之禮則誠敬未
專甚爲不可且奉 神主祔廟後即還 廣孝殿遂行奠禮奉安位板
則似乎適中然予當舉禮之日夜分而起先 詣 原廟 行動駕祭
奉 神主祔廟後又還 原廟奉安位板則非獨予之倦怠百官有待
從煩屑之勞予以爲當 祔廟之日親奉 神主祔于 宗廟命臣於
原廟攝行奠禮仍安位板訖更侍 祔廟後擇日親祭何如卿等其
議以聞廷顯等皆曰攝行可矣即命禮曹以此節次修儀註以進 上
又傳教曰嚮許稠言曆代帝王謚號三代以上皆以一字如文武成康是

也至後世唐宋及本國高麗王氏皆加上尊號或十餘字或二十餘字美號有限而互相追崇故名實不孚予亦以爲不足貴也今於母后亦加上徽號乎恐元敬之外更無以加廷顯等曰上教善矣然本朝宗廟四室以上皆上徽稱今太宗王后則當百世不遷寔敬太祖神懿王后例加上尊號若在後世當從稠議上曰然又傳教曰今志云詐稱仁德殿之子其罪極矣然予常念雖有人罪當處死若緣情可恕則悉欲貸之予之本心也此僧但聽母言以爲實然耳豈知其不然也今欲不誅何如僉曰此僧初雖信聽母言濫稱王子仁德殿既曰非予之子且在辛丑年太宗下義禁府取招此僧曰今後仍前妄稱仁德殿之子大懲鑑後爲此僧者固當自思其本絕不復道可矣猶且冒稱橫行各道其志憐矣况前日海生旣伏誅矣今若不誅此僧則人豈知非仁德殿之子此僧亦非懲艾者必仍前妄稱自恣橫行請依太宗宣旨以正邦典上曰予當思之○賜被虜漢人張清郭天保等男婦共十四名各衣一襲笠靴鞋襪○戊申視事○慶尚道鑄錢別監河澹進新鑄錢十貫○己酉傳旨咸吉道各官住自稱王室族沁人等其世系備細覈問以啓○差中軍司直艾儉管領被虜逃來漢人鄭

天保張清張儀等男婦共一十四名口解赴遼東○庚戌義禁府啓其
每子僧志云妄稱仁德殿子罪請依教旨亂言干犯於上情理切害
者處斬籍沒家產從之○是日使臣王賢到義州遠接使李孟昫謂賢
曰道路險阻時且熱甚宜徐行且我 殿下喪制未盡來七月初二日
行禫十二日祔 先王子 宗廟若大人疾馳入京 殿下行祀事待
使臣兩不專心必以爲慮請徐行待七月十三日入京賢荅云禫祭祔
廟皆重事且吾之爲來事不干於國 殿下雖不出見吾不嫌焉孟昫
曰 殿下事大至誠使臣至國焉得安心不親接待耶賢曰我之受命自
有限日不可緩也○辛亥視事○命許敬寧君祔出入還給驅史○聖
節使禮曹判書申商回自京師○戶曹啓按經濟文衡朱文公於建寧
府開耀鄉立社倉一所逐年歛散每一石收耗米三升依此制受教義
倉米粃每一石隨其本色加納三升以備後日之耗損願自今義倉之
制京外各官虧欠米粃除妄費盜用及雨漏地濕所損者依式追徵外
隨其本色每一石計除耗米三升從之○癸丑三韓國大夫夫人宋氏卒
上率百官舉哀輟朝三日賻米豆各一百石紙二百卷○禮曹啓卒
三韓國大夫夫人宋氏歛殯及禮葬諸事請依貞善公主例施行從之○

禮曹據奉常寺牒呈啓今廣孝殿奉安位板積請依朱文公家禮內
神主座制製造從之○甲寅禮曹啓請宗廟桓祖室樂章皇祖二
字改顯祖太祖室樂章皇考二字改皇祖奉教敬依○吏曹據奉常
寺牒呈啓元敬王后加上尊號彰德昭烈奉教敬依○星山府院君
李稷吏曹判書許稠等議一元敬王后加上尊號後於神主無追書
之例且神主改造古制所無只於祭文祝文具書加上尊號一加上尊
號前期一日於廣孝殿當行預告祭祭式依朔望例一加上尊號玉
冊奉獻時祭儀若依別祭例則嫌於援尊宜從朔祭例於太宗大王
前用朔祝太后前用別祝讀玉冊藝文館大提學卞季良議加上尊
號玉冊奉獻時祭儀依文昭殿神懿王后忌辰兼祭太祖例宜於
朔祭用有名日別祭儀餘同稷等議命用季良議○乙卯禮曹啓去戊
戌年使臣迎接時設龍亭備金鼓儀仗鼓樂迎引使臣云今此祭非爲
朝鮮來不可以迎命禮迎之只令伴人賫祭文以入今使臣迎接非迎
命且喪制未終請除金鼓儀仗鼓樂先將此意令通事預告使臣○禮
曹據奉常寺牒啓今耐廟後廣孝殿獻陵朔望祭請依文昭
殿建元陵例用油白餅從之○欽問起居使中軍同知摠制玄貴命賫

捧奏本發行其奏本曰永樂二十二年六月初八日陪臣申商回自京師欽聞車駕巡幸北方伏惟 聖躬萬福謹備進獻禮物差陪臣中軍同知搃制玄貴命賚領前赴行在欽問起居外今將禮物開坐謹具奏聞黃細苧布二十四匹白細苧布三十四匹黑細麻布五十四匹人參一百觔雜色馬一十匹○丙辰吏曹啓平安道各翼屬郡縣多小不一軍數不均且江東三和安州孟山陽德義州定寧朔州江界等官專不分屬三翼不便今以軍丁多小地里遠近量宜更定其各翼軍丁之數具錄于後平壤道中翼平壤水陸軍戶子枝并一萬三千四百三十四名左翼中和祥原三登江東共四邑軍丁搃七千二百六名右翼順安江西甌山龍岡咸從三和共六邑軍丁搃九千七百三十三名安州道中翼安州慈山肅川永柔共四邑軍丁八千二百四十五名左翼成川殷山陽德共三邑軍丁搃五千三百五十五名右翼价川順川德川孟山共四邑軍丁搃六千七百二十四名義州道中翼義州麟山龍川定寧鐵山共五邑軍丁搃五千四十五名左翼宣川隨川郭山共三邑軍丁搃三千四百四十四名右翼定州嘉山共二邑軍丁搃三千三百二十五名朔州道中翼朔州撫山泰川共三邑軍丁搃三千九百三十七名左翼

延山博川雲山共三邑軍丁搃三千三百七十八名右翼昌城碧潼共
二邑軍丁搃二千一百二十八名江界道中翼江界間延共二邑軍丁
搃二千八百三十名左翼熙川軍丁一千六十名右翼理山軍丁一千
六百八十六名 從之○戶曹啓曾降教旨江原咸吉道濟用監納紳
稅布每戶收其一匹於搃數內三分之一上納其殘殘戶鰥寡孤獨勿
并收納今詳江原道在前一萬五千二百九十戶咸吉道一萬六千七
百八十戶然江原道近年人物數多流移請自今大小各戶隨宜收稅
江原道二千匹咸吉道二千五百匹每年依式上納殘殘戶鰥寡孤獨
及一戶人子枝稅布勿令并收其托以上納重歛守令及不能考察監
司首領官推問科罪 從之○司憲府啓平安道知德川郡事崔世溫
亂政貪汚入已又濫用之物計贓搃一百四貫請依監守自盜律處斬
其贓物徵還官主命他罪人行刑時更啓其徵贓物依律施行世溫子
李起搢申聞鼓曰臣父嘗爲數州皆以清白聞今於德川郡以貪汚得
罪實爲痛悶行臺監察羅織成罪請辨之上曰此人贓物甚多至以
賑濟之米換籩入已使民飢死其罪極矣允贓吏雖經赦宥不在原例
已有著令然其子許寬不可不辨姑除求辨贓物以他見贓更計數以

聞○丁巳 上率群臣幸宋氏第行哭臨禮如儀○司憲持平李堅基
啓曰李從茂前日付處時偶有微疾 上乃許病瘳後付處息至渥也
爲從茂計病差之日即歸其處固其宜也病已瘳而尚不歸淹留果川
本府具辭以啓今已久矣未蒙俞音傳曰予見大司憲明言之○大司
憲柳頴等上疏曰臣等竊謂志在救民則罪可恕律不原情則怨必興
此和氣之所由傷不可不慎也前此十餘年間各道義倉糶穀散之不
節而收之不齊一戶未納之數多至百餘石國之糧餉散在民間而會
計則率皆虛數故國家每遣敬差而督納之但因連歲不稔一夫所獲
未能償糶貸而充歲貢也各道敬差恐違條令皆欲驟納鞭撻色吏辱
及守令未未登場而差人監收禁其他費專輸義倉猶未准也故拘繫
家人于他官或老或幼蓬頭赤脛絡繹於道每當祁寒凍餓獄中爲守
令者不忍催徵其所未收虛稱已納錄于會計者蓋隨後盡納之計也
且大貢不可廢皆貸而充之遑恤口腹乎至春尤飢因傷獄寒多致溫
疾奚暇東作之慮乎如是而不能急圖則有違 聖上敬天勤民之道
罪莫重焉故即欲報監司而移戶曹若待報則時必失而救難及矣爲
守令者當如何也故未免擅自分給之責其不報監司不減會計者亦

隨後還充之計也是皆急於救民不得已而為之者也豈一毫利己之私乎近者前判牧事李暉判官朴錦慶尚道監司所論開寧縣監崔子涇龍宮縣監金明老等所犯類此也而並以那移出納照律杖一百流三千里唯暉與錦特蒙末減而子涇明老則通減一等又今戶曹將如此所犯守令受教移關者頗多若不原情依此律定罪則臣等恐官吏以救民之故而盡為千里之流也若改按律則罪同罰異此臣等之難斷也詳考那移出納之律則所請那移出納者收支加減他用者之謂也王孝乾者是已若以擅自貸糶虛錄會計者比論犯贓而同按此律則志在救民者一朝盡收職牒並收科田反為徒隸妻孥歎曰何獨已甚至於如是也則召怨傷和之一端也其於原情宥律為何如也伏望殿下依唐太宗省冤朝堂古事命下政府六曹前頭官吏所犯與那移出納之律擬議得中申聞施行以正刑章國家幸甚前此凡守令還上擅葭及未收納而稱已收納者有司按以那移出納之律杖一百徒三年淮陽府使陳遵擅給還上一千七百六十石不減會計又以未收為已收事覺下司憲府治之大司憲柳頴等議上項所犯皆為民其情可憐按以應申上而不申上律以啓上謂太輕頴等不得已仍舊按以

那移出納既而頴等上疏論辨 上覽之怒曰近日朴錦陳遵等皆擅
發倉粟而遵則分給飢民似非錦比然遵既擅發又不轉聞且以未收
虛錄會計其爲欺瞞之罪則一也遵之罪正坐於此今憲府所言不中
如此臺負非一何其論至於此兵曹判書趙末生曰憲府執法而反爲
是論甚不可也○禮曹啓 太宗祔廟儀註前期三度習儀祈晴于社
稷路次排班軍威前行次文武百官分左右前導次陽繖次大駕次陽
扇左右分立次紅門大旗中立次稍旗左右分立次中旗左右分立次
白澤旗左右分立次白虎旗中立次玄鶴旗在左白鶴旗在右次熊骨
朶子左右分立次豹骨朶子左右分立次銀骨朶子左右分立次金骨
朶子左右分立次鐸鼓左右分立次金鐙左右分立次金斫子左右
分立次幢左右分立次銀斫子左右分立次金斫子左右分立次孔雀
扇左右分立次青蓋左右分立次紅蓋左右分立次紅繡鞍馬居中左
右分立次樂部居中左右分立次寶樓子次冊樓子次腰輦次香亭子
次龍鳳扇左右分立次陽繖次 太宗象輅次功臣樓子次青紅蓋左
右分立次孔雀扇左右分立次鳳扇左右分立次青繡鞍馬居中左右
分立次樂部居中左右分立次寶樓子次冊樓子次輦腰次香亭子次

陽繳次 王太后象輅次內官次親屬次軍威在後儀註前期禮曹啓

聞散告攸司隨職供辦祔廟前二日宗廟令帥其屬掃除廟之內外

漢城府修路從 廣孝殿外門至 宗廟大門其 太宗室應緣幄帳

席褥等物攸司先造其日陳設於室中前一日預告 宗廟其具饌行

禮並如朔望儀又告 廣孝殿告官具 祭服其具饌行禮又如朔望儀祝文 具附

廟意兼 述從享忠扈衛設 殿下幄次於 廣孝殿大門外近東西向又設

王世子次於 殿下幄次東南西南向皆隨地之宜又於 宗廟大門內

道東設幄次隨地之宜設祗迎位於幄前西向設大次於齋宮南向設

小次於廟之階階東西向設 王世子次於齋宮東南西南向又設 神

主幄座於廟南門外道西東向幄內設床及褥席各二尚輦兵曹 兼 進 儀司

象輅腰輦樓子仗衛繳扇等於 廣孝殿大門外車駕出宮前一日晝

漏上水一刻槌鼓為一嚴通禮門設 王世子以下陪祭文武群臣位

於闕門外文東武西相對俱重行北上 王世子以下文武群官各具

朝服三刻槌鼓為二嚴判通禮跪啓請中嚴陪祭文武群官俱集闕門

外大享行事執事 官直請享所攸司陳大駕鹵簿於闕門外五刻槌鼓為三嚴諸衛

之屬各督其隊入陳於殿庭奉禮郎引陪祭群官就門外位知通禮引

王世子就門外位侍衛之官各服其器服文武侍臣俱詣勤政殿西

階奉迎判司僕進象輅於勤政門前南向千牛將軍一人執長刀立於

輅前知通禮在判通禮之前通贊二人在知通禮之前判通禮跪啓外

辦判司僕攝衣而上正立執綬 殿下服冠袍升輦以出降自西階樂

部懸而不作千牛將軍前執轡 殿下降輦升輅判司僕立授綬侍臣

夾侍如常知通禮進當輅前跪啓請車駕進發啓訖俛伏興退復位凡

通禮啓請皆進駕前車駕動知通禮與通贊夾引以出千牛將軍夾輅

而趨駕出闕門外至侍臣上馬所知通禮跪啓請車駕小住教文武侍

臣上馬判通禮前承旨退稱曰教可通贊唱文武侍臣上馬諸侍衛之

官各督其屬左右翼駕尚瑞官奉寶前導左右侍臣夾侍於輅前文武

侍臣上馬畢知通禮跪啓請教車右升判通禮前承旨退稱曰教可知

通禮退復位千牛將軍升訖知通禮跪啓請車駕進散退復位車駕動

不鳴鼓吹不得諠譁其陪祭之官在玄武隊後如常儀車駕至 宗廟

洞口文武侍衛之判通禮跪啓請降輅 殿下降輅判通禮導 殿下

詣拜位依司先於道傍向廟北向立跪啓請四拜 殿下四拜訖判通

禮導 殿下還升輅文武侍衛之車駕至 廣孝殿外門外侍臣下馬

所車駕小住文武侍臣皆下馬分立鞠躬千牛將軍降立於輅右車駕
動千牛將軍夾路而趨駕至外門外回輅南向判通禮啓請降輅俛伏
興還侍立 殿下降輅升輦入齋殿繳扇華蓋侍衛如常儀攸司設
殿下褥位於 廣孝殿東門外西向隨地之宜通禮門設 王世子以
下陪祭群官位於 殿下褥位之後近東文左武右中心爲頭異位重
行俱西向分引陪祭群官入就位知通禮引 王世子入就位判通禮
導 殿下至褥位西向立啓請四拜 殿下四拜通贊贊四拜 王世
子以下在位者皆四拜訖判通禮導 殿下還齋殿通禮門分引 王
世子以下陪祭群官集齋殿之南文東武西通贊承旨教群官各就次
宿衛如常校書館員以祝版捧進近臣傳捧以進 殿下署訖近臣捧
出附殿司告動駕前一日通禮門設 殿下版位於 廣孝殿東階東
南西向設 王世子以下文武群官位於外庭文東武西中心爲頭異
位重行俱北向其日典祀官帥其屬入奠祝版於 神位之右設香爐
香合并燭於 神位前實饌具饌品與預設尊於戶外之左 殿下具
冕服 王世子具朝服其行事執事官服祭服陪祭群官服朝服訖時
至通禮門分引宗室以下文武群官入就位知通禮引 王世子入就

位大祝開櫃捧出 太宗神主設於座覆以白苧巾次宮闈令開櫃捧

出 王太后神主設於座覆以青苧巾以西為上訖贊禮導 殿下詣

版位西向立跪啟請鞠躬四拜與平身 殿下鞠躬四拜與平身通贊

唱鞠躬四拜與平身 王世子以下在位者皆鞠躬四拜與平身贊禮

導 殿下升自東階詣尊所西向立執尊者酌酒近侍二人以爵受酒贊

禮導 殿下詣神位前北向立跪啟請跪搢圭 殿下跪搢圭 如搢不使近侍

承近侍一人奉香合跪進近侍一人奉香爐跪進贊禮啟請三上香

殿下三上香近侍奠爐于案 進者在東西向真爐在 近侍捧爵跪進贊

禮啟請執爵獻爵 殿下執爵獻爵以爵授近侍奠于 神位前近侍

以副爵跪進贊禮啟請執爵獻爵 殿下執爵獻爵以爵授近侍奠于

王太后神位前贊禮啟請執圭俛伏與小退北向跪 殿下執圭俛

伏與小退北向跪大祝進 神位之右東向跪讀祝文訖贊禮啟請俛

伏與再拜與平身 殿下俛伏與再拜與平身贊禮導 殿下出戶降

自東階復位贊禮跪啟請鞠躬四拜與平身 殿下鞠躬四拜與平身

通贊唱鞠躬四拜與平身 王世子以下在位者皆鞠躬四拜與平身

贊禮啟禮畢導 殿下出至大門外幄次即座知通禮引 王世子出

立於外門外道左通禮門分引宗室以下文武群官出外門外分左右
序立大祝宮闈令納 神主如儀典祀官帥其屬徹禮饌祝版瘞於坎

神主詣 宗廟告動駕祭畢攸司設褥位二於殿上 神位前南向

指諭牽龍等各服其服以腰舉二置於褥位上 太宗舉在右 王后舉在左 繖扇入陳

於殿階間分左右都知等服其服捧托子左右分立置冊寶樓子等於

殿庭 兩位樓子 各分左右 又設褥位二於南門外置象輅二於其前南向 兩位象輅 各分左右

右儀仗樂部排立於其南如儀時至攝判通禮入詣 太宗神位前跪

啓請降座升輦耐廟啓訖俛伏興次詣 王太后神位前亦如之俛伏

興退內侍捧 太宗冊寶又內侍捧 王太后冊寶以次先降皆置於

樓子又內侍捧几置於輿上大祝捧 太宗神主櫃安於輦上几後次

宮闈令捧 王太后神主櫃安於輦上几後 凡主出則先王神主先出 八則先王神主先入 扶

侍降自西階冊寶樓子等前行指諭牽龍等捧昇神輦而出至象輅後

褥位小駐攝判通禮跪啓請降輦升輅啓訖俛伏興內侍捧几置輅中

大祝捧 太宗神主櫃升輅 其大祝便於 次宮闈令捧 王太后神主

櫃升輅如上儀訖 功臣樓子駐輅前街東 輅將發乃行隨輅後如儀 千牛將軍夾輅而趨 太宗

行王太后輅次之 判通禮導 殿下升輦前行攝判通禮進當輅前跪 各有儀仗樂部

啓請輅小駐教文武群官上馬啓訖 王世子以下文武群官皆上馬

前導攝判通禮啓請輅進發啓訖俛伏興退輅進發鼓吹振作至 宗

廟大門外 王世子以下文武群官皆下馬左右序立 殿下降輦入

大門內幄次即座鼓吹止分左右其鼓吹並享訖退儀仗等并於廟輅南門外左右列立缺享禮畢退

至 王世子以下文武群官皆鞠躬過則平身輅至大門迴輅南向尚

輦以腰輦進輅後褥位上臨時設褥位二攝判通禮進當輅前跪啓請降輅升

輦啓訖俛伏興內侍捧几置於輦上大祝宮闈令各捧神主櫃安於輦

上如前儀神輦將入大門判通禮導 殿下就祗迎位 神輦至 殿

下鞠躬過則平身判通禮導 殿下還入次 神輦至廟南門幄前攝

判通禮跪啓請降輦入幄啓訖俛伏興內侍捧几置於幄座大祝宮闈

令各捧神主櫃安於幄座王后神主在左其繖扇樓子等停列於幄前功臣樓子止於

神門外神主升附後執事者判通禮導 殿下升輦入齊宮繖扇華

蓋侍衛如常儀知通禮引 王世子入次其 宗廟陳設尊彝酒醴站

爵省牲告潔進署祝版其祝文兼陳設樂器并如常儀初 神輅將至

廟攸司設耐謁褥位二於廟庭橫階南當中北向太宗褥位在西執禮設 殿

下版位贊者設諸享官位及陪祭群官位并如常儀晨裸時至宗廟令

典祀官各帥其屬入實饌具畢贊引引監察升自阼階按視堂之上下

糾察不如儀者還出執禮帥謁者贊者贊引入自東門先就階間拜位

重行北向西上四拜訖各就位雅樂令帥工人二舞入就位文舞入陳

於懸北武舞立於懸南道西通禮門分引陪祭宗室以下文武群官入

就位知通禮引亞獻官亞獻官若非王則謁者引謁者贊引各引諸享官俱就東

門外位贊引引監察典祀官大祝祝史齋郎宗廟令宮闈令協律郎奉

俎官執尊罍籩簋者七祀功臣祝史齋郎執尊罍籩簋者入就懸北拜

位重行北向西上立定執禮曰四拜贊者傳唱鞠躬四拜興平身九執禮有

辭贊者皆傳唱監察以下皆鞠躬四拜興平身訖贊引引監察就位贊引引諸

執事詣盥洗位盥悅訖各就位知通禮引亞獻官謁者贊引各引終獻

官進幣瓚爵官薦俎官奠幣瓚爵官七祀功臣獻官入就位贊引引大

祝宗廟令宮闈令升自阼階詣第一室入開埽室大祝宮闈令捧出

神主設於座詩神帷內於几後開置設於座先王神主大祝捧出覆以

以次捧出第二室以下神主如第一室儀贊引引齋郎詣爵洗位洗

瓚拭瓚洗爵拭爵置於籩奉詣泰階諸祝史各迎取於階上置於尊所

坫上訖其殿上諸執事各逐便下階相向序立俟神饗升殿各復階上

位判通禮跪啓外辦導 殿下出織扇華蓋侍衛如常儀禮儀使導

殿下至東門外近侍跪進圭禮儀使跪啓請執圭 殿下執圭華蓋仗

衛停於門外尚瑞官奉寶陳於小次之側禮儀使導 殿下入自正門

東門○侍衛不應入者止於門外 協律郎跪伏舉麾與九取物者皆跪伏而取以與奠物則跪奠訖伏而後

興工鼓祝軒架作承安之樂 殿下詣版位西向立每立定禮儀使退立於左 協律

郎偃麾戛敵樂止九樂協律即跪伏舉麾與工初 殿下將入門攝

判通禮進當 太宗神主幄前跪啓請降座升輦拊謁啓訖伏與內

侍捧几置於輦上大祝捧 太宗神主櫃安于几後次宮闈令捧 王

太后神主櫃安于几後訖執禮堂下引 神輦至廟南門織扇停列於

門外侍衛退齋郎等陪 神輦入自正門至拊謁褥位大祝宮闈令各

捧櫃安於褥位開櫃大祝捧出 太宗神主安於趺上次宮闈令捧出

王太后神主安於趺上訖太宗神主在西 攝判通禮進於褥位西北面跪啓稱

以今吉辰 太宗恭定聖德神功文武光孝大王彰德昭烈元敬王太

后拊謁啓訖伏興退小頃攝判通禮進褥位之西東面跪啓請升輦

拊享啓訖伏興退降就本班大祝宮闈令進跪於褥位各捧 神主

安於輦其置蓋亦置 神輦既升升自泰階 大祝宮闈令奉引入第六室至幄

座前內侍捧几置於座大祝宮闈令各捧神主安於座覆以巾以西

為上執事者奉冊寶入置於案上其腰輦降自階由東門出禮儀使前跪啟請鞠

躬四拜興平身殿下鞠躬四拜興平身執禮曰四拜在位者皆鞠躬

四拜興平身先拜者不拜執禮曰禮儀使啟請行事禮儀使前跪啟有司謹

具請行事退復位軒架作景安之樂烈文之舞作九成止近侍詣盥洗

位盥悅訖還侍立謁者引進幣瓚爵官奠幣瓚爵官詣盥洗位盥悅訖

升自階階詣翼祖室尊所北向立執禮曰禮儀使導殿下行裸鬯

禮禮儀使導殿下軒架作承安之樂詣盥洗位北向立跪啟請搢圭

殿下搢圭內侍跪取匱與沃水又內侍跪取盤承水殿下盥手內

侍跪取巾於篚以進殿下悅手訖內侍受巾奠於篚禮儀使啟請執

圭殿下執圭禮儀使導殿下升自階禮儀使近侍從升訖樂止詣

翼祖室尊所西向立登歌作肅安之樂烈文之舞作執尊者舉罍進幣

瓚爵官酌鬱鬯近侍以瓚受鬱鬯禮儀使導殿下詣神位前北向

立跪啟請跪搢圭殿下跪搢圭近侍一人捧香合跪進近侍一人奉

香爐跪進禮儀使啟請三上香殿下三上香近侍奠爐于案近侍以

瓚授進幣瓚爵官進幣瓚爵官捧瓚跪進禮儀使啟請執瓚殿下執

瓚灌地訖以瓚授奠幣瓚爵官奠幣瓚爵官受以授大祝近侍以幣篚

授進幣瓚爵官進幣瓚爵官捧幣跪進禮儀使啟請執幣獻幣 殿下執幣

獻幣以幣授奠幣瓚爵官奠于案 凡進香進瓚進幣皆在東西向奠爐受瓚奠幣皆在西東向進爵奠爵佳

此禮儀使啟請執圭俛伏興 殿下執圭俛伏興禮儀使導 殿下出

戶詣 度祖室次詣 桓祖室次詣 太祖室次詣 恭靖王室次詣

太宗室上香裸鬯奠幣並如上儀訖禮儀使啟請執圭俛伏興 殿

下執圭俛伏興登歌止進幣瓚爵官奠幣瓚爵官皆降復位禮儀使導

殿下出戶就前楹外當中北向立禮儀使跪啟請鞠躬再拜興平身

殿下鞠躬再拜興平身禮儀使導 殿下軒架作承安之樂降自阼

階復位樂止當登歌止時諸祝史各取毛血盤肝骨鐙於前楹外俱入

奠於神位前 毛血盤在盥之後肝骨鐙在道之左諸祝史俱取肝骨燔於爐炭還尊所

饋食 殿下既升裸贊引引典祀官帥進饌者詣厨以匕升牛于鑊實

于一鼎次升羊實于一鼎次升豕實于一鼎 每室牛羊豕各一鼎皆設局罍祝史

對舉入設於饌幔內謁者引薦俎官出詣饌所奉俎官隨之俟 殿下

裸訖復位樂止執禮曰進饌祝史抽局委于鼎右除罍加匕畢于鼎典

祀官以匕升牛實于牲匣次升羊豕各實于牲匣 每室牛羊豕各一匣次引薦俎

官奉 翼祖室俎奉俎官各奉牲匣典祀官引饌入自正門南俎初入

門軒架作雍安之樂諸祝史俱進徹毛血槃自阼階授齋郎以出饌至

泰階諸大祝迎於階上薦俎官詣 翼祖神位前北向跪奠先薦牛次

薦羊次薦豕諸大祝助奠奠訖啓牲匣蓋詣 度祖室次詣 桓祖室次詣

太祖室次詣 恭靖王室次詣 太宗室奉奠並如上儀訖樂止謂

者引薦俎官以下降自阼階復位諸大祝各取蕭黍稷孺於腊燔於爨

炭還尊所謂者引進幣瓚爵官奠幣瓚爵官升詣 翼祖室尊所北向

立執禮曰禮儀使導 殿下行初獻禮禮儀使導 殿下軒架作承安

之樂升自阼階訖樂止詣翼祖室尊所西向立登歌作壽安之樂列

文之舞作執尊者舉巵進幣瓚爵官酌醴齊近侍二人以爵受酒禮儀

使導 殿下詣 神位前北向立跪啓請跪搢圭 殿下跪搢圭近侍

以爵授進幣瓚爵官進幣瓚爵官奉爵跪進禮儀使啓請執爵獻爵

殿下執爵獻爵以爵授奠幣瓚爵官奠于 神位前近侍以副爵授進

幣瓚爵官進幣瓚爵官奉爵跪進禮儀使啓請執爵獻爵 殿下執爵

獻爵以爵授奠幣瓚爵官奠于 王后神位前禮儀使啓請執圭俛伏

與小退北向跪 殿下執圭俛伏與小退北向跪樂止大祝進 神位

之右東向跪讀祝文訖樂作禮儀使啓請俛伏興 殿下俛伏興禮儀

使導 殿下出戶樂止以次酌獻並如上儀 翼祖室歌昭寧之曲 桓祖

室歌威明之曲 太祖室歌昭明之曲 恭禮儀使啓請執圭俛伏興

殿下執圭俛伏興曲終樂止進幣瓚爵官奠幣瓚爵官皆降復位禮

儀使導 殿下出戶就前楹外當中北向立禮儀使跪啓請鞠躬再拜

興平身 殿下鞠躬再拜興平身禮儀使導 殿下軒架作承安之樂

降自階復位禮儀使跪啓請入小次 殿下將至小次禮儀使跪啓

請釋圭近侍受圭 殿下入小次簾降樂止文舞退武舞進軒架作舒

安之樂舞者立定樂止亞終獻 七祀功臣 初 殿下將復位執禮曰行

亞獻禮知通禮引亞獻官詣盥洗位北向立贊搢笏盥手 訖手 盥手

不贊執笏引亞獻官升自階詣 翼祖室尊所西向立軒架作壽安

之樂昭武之舞作鄉樂交奏執尊者舉罍酌盞齊執事者二人以爵受

酒知通禮引亞獻官詣 神位前北向立贊跪搢笏亞獻官跪搢笏執

事者以爵授亞獻官亞獻官執爵獻爵以爵授執事者奠于 神位前

執事者以副爵授亞獻官亞獻官執爵獻爵以爵授執事者奠于 王

后神位前知通禮贊執笏俛伏興亞獻官執笏俛伏興引出以次酌獻

並如上儀訖知通禮贊執笏俛伏興亞獻官執笏俛伏興樂止引出就
 前楹外當中北向立知通禮贊鞠躬再拜興平身亞獻官鞠躬再拜興
 平身引降復位亞獻官獻將畢執禮曰行終獻禮謁者引終獻官行禮
 如亞獻儀引降復位初終獻官既升贊引引七祀獻官詣盥洗位搯笏
 盥手悅手訖執笏詣尊所執尊者舉冪酌酒執事者以爵受酒獻官詣
 神位前西向跪搯笏執事者授爵獻官執爵獻爵奠爵以次奠訖執笏
 俛伏興就司命神位前西向跪祝就獻官之左北向跪讀祝文訖獻官
 少退當中西向再拜贊引引復位初七祀獻官將詣盥洗位贊引引配
 享功臣獻官詣盥洗位搯笏盥手悅手訖執笏詣尊所執尊者舉冪酌
 酒執事者以爵受酒獻官詣神位前東向立搯笏執事者授爵獻官執
 爵獻爵奠爵以次奠訖執笏祝史奉教書進神位之右立讀訖贊引引
 獻官復位飲福初終獻官既復位謁者引進幣瓚爵官薦俎官升自阼
 階詣飲福位北向立大祝詣翼祖室尊所以爵酌上尊福酒又大祝
 持俎進減神位前俎肉執禮曰禮儀使導殿下詣飲福位禮儀使跪
 啓請詣飲福位簾捲出次軒架作承安之樂近侍跪進圭禮儀使跪啓
 請執圭殿下執圭禮儀使導殿下詣飲福位西向立樂止登歌作

壽安之樂大祝以爵授進幣瓚爵官進幣瓚爵官奉爵北向跪進禮儀
使跪啓請跪搢圭 殿下跪搢圭受爵飲訖進幣瓚爵官受虛爵以授

大祝大祝受復於坵大祝以俎授薦俎官薦俎官奉俎北向跪進禮儀

使啓請受俎 殿下受俎以授近侍近侍奉俎降自阼階出門授司饗

進幣瓚爵官薦俎官皆降復位禮儀使啓請執圭俛伏興 殿下執圭

俛伏興樂止禮儀使導 殿下軒架作承安之樂降復位樂止跪啓請

鞠躬再拜興平身 殿下鞠躬再拜興平身執禮曰再拜在位皆鞠躬

再拜興平身執禮曰徹籩豆諸大祝入室徹籩豆徹者籩豆各一登歌

作雍安之樂七祀功臣祝史齋郎各徹籩豆徹訖樂止軒架作景安之

樂鄉樂交奏禮儀使啓請鞠躬四拜興平身 殿下鞠躬四拜興平身

執禮曰四拜在位者皆鞠躬四拜興平身樂一成止禮儀使啓禮畢導

殿下還齋宮軒架作承安之樂出門樂止禮儀使跪啓請釋圭 殿

下釋圭近侍跪受圭侍衛如常儀入齋宮釋冕服執禮曰望瘞知通禮引亞獻

官詣望瘞位北向立執禮帥贊者詣望瘞位西向立諸大祝取黍稷飯

藉用白茅束之以篚取祝版及幣降自西階置於坎執禮曰可瘞置土

半坎宗廟令監視知通禮引亞獻官謂者贊引各引諸享官出執禮率

贊者還本位通禮門分引陪祭宗室以下文武群官以次出贊引引監察及諸執事俱復懸北拜位立定執禮曰四拜監察及諸執事皆鞠躬四拜與平身訖贊引以次引出雅樂令帥工人二舞出大祝宗廟令宮闈令納 神主如常儀執禮帥謁者贊者贊引就拜位四拜而出七祀獻官詣西門外七祀瘞坎之南北向立執事者置祝版於瘞坎瘞訖功臣祝史奉教書出西門外焚之退典祀官 宗廟令各帥其屬徹禮饌宮闈令闔戶以降乃退車駕還宮攸司陳大駕鹵簿於還途如常儀典樂令陳樂部於齊宮南門外 王世子以下文武群官各具朝報 殿下服冠袍 王世子以下文武群官序立於大門外文武侍臣詣齊宮迎判司僕進象輅於大門外南向千牛將軍立於輅前判通禮跪啓外辦判司僕升執綏 殿下升輦出次繳扇華蓋侍衛如常儀千牛將軍前執轡 殿下至門外降輿升輅判司僕立受綏知通禮跪啓請車駕進發退復位車駕動千牛將軍夾輅而趨至侍臣上馬所知通禮跪啓請車駕小駐教侍臣上馬判通禮前承旨退稱曰教可通贊唱文武侍臣上馬尚瑞官奉寶前導知通禮跪啓請教車右升判通禮前承旨退稱曰教可知通禮退復位千牛將軍升訖知通禮跪啓請車駕進發退

復位車駕動鼓吹振作而還文武群臣導從如常儀駕至景福宮門外侍臣下馬所車駕小駐文武侍臣皆下馬分立鞠躬千牛將軍降立於輅右車駕動千牛將軍夾輅而趨駕至勤政門樂止回輅南向判通禮進輅前跪啓請降輅俛伏興還侍立 殿下降輅升輿以入繖扇華蓋侍衛如常儀侍臣從至殿庭攸司鋪幄座於勤政殿當中南向設香爐二於前楹外設案於殿階上通禮門設協律郎位於殿階上近西東向設左右侍臣及 王世子以下文武群官位如常儀繖扇仗衛陳於殿階上下樂部陳於群官之南如常儀訖禮曹負引諸道進箋負由東門入樂官奏樂前導至正門外樂止升自東階以箋文置於案上訖退 王世子以下文武群官及諸道進箋負皆就門外位典樂令帥工人就位協律郎就位通禮門分引 王世子以下文武群官入就位通贊唱班齊判通禮進跪啓請陞殿中禁傳嚴爐烟升尚瑞官奉寶前行 殿下升輿以出上護軍啓看協律郎跪俛伏舉麾興樂作典儀招通贊贊鞠躬群官皆鞠躬 殿下升座上護軍啓看協律郎偃麾樂止通贊贊平身群官皆平身典儀招通贊贊致詞致詞官致詞官代班首就月臺中心近北通贊贊跪群官皆跪致詞曰具銜臣某等大祀既成禮當慶

賀俛伏興退復位通贊贊俛伏興四拜興平身樂作群官皆俛伏興四拜興平身樂止通贊贊跪群官皆跪山呼千歲山呼千歲再山呼千歲通贊

贊俛伏興四拜興平身樂作群官皆俛伏興四拜興平身樂止典儀唱進箋執事官舉諸道箋案由東門入判通禮引至簾前置案訖判通禮

贊宣箋宣箋官宣最高官箋文訖執事官撤箋案置於寶案之南判通禮跪啓禮畢通贊贊禮畢 殿下降座樂作通贊贊鞠躬群官皆鞠躬

殿下升輿以入樂止贊平身群官皆平身通禮門分引 王世子以下文武群官以次出還宮時義禁府軍器監進攤禮雜戲於 宗廟洞

口成均館生徒等進歌謠於鍾樓西街教坊進歌謠於惠政橋邊仍呈才又於景福宮門外左右結山臺 殿下既還宮受賀禮如儀畢仍頒

教書及宥旨賜享官諸執事宴○戊午視事 上謂議政府六曹曰還上收支時擅自分給守令及以未收還上為已收守令論罪之律擬議

以聞仍曰予於守令罪之者非以民飢發倉也非以未盡取納也雖直發之隨即轉達亦以未盡收納從實轉啓則奚罪之有發倉後不報國

家妄以未收為已收欺冒國家雖按以那移出納臨斷尚從未減贖杖罪除後年今憲府上疏以為志在救民則罪可恕律不原情則怨必生

亦曰未未登場而差人監收禁其他費民之瘟疫皆以拘繫家人寒獄
之所致卿等以謂如何僉曰此事臣等所未聞也 殿下斷罪允當憲
司之疏未審律文與 上意也於是大司憲柳潁等上言臣等以法官
狀申措辭不中此乃臣等昏迷所致不宜風憲之任乞罷臣職○禮曹
啓黃海道殷栗縣監周義物故請依他例致賻從之○己未視事○議
政府六曹退朝會議使判書權軫參贊卓慎啓曰臣等切見憲府封章
內志在救民則罪可恕律不原情則怨必生守令以糴米督納雖當盛
冬拘繫家人置諸寒獄民間瘟疫職此而生且敬差官當未未登場之
時差人監收禁其他費此事非臣等所聞也允爲守令者若見民飢勢
不容緩則宜發倉賑貸隨即啓聞例也且民貧而未納糴非守令之罪
亦當直報其由今陳遵等發倉擅給不即啓達又以未納爲己納其欺
瞞之罪大矣 殿下宵旰憂勤猶恐一民之或飢潁等不體至懷妄意
上疏似以 殿下爲專責守令擅發賑民未收還上之罪其言勢不順
有乖於 上意請下義禁府鞫問其由以絕後人之疑 上曰前日潁等
知其言之不中已請解職將以新除憲官治之否則使刑曹推劾下
於義禁府予不爲也乃使存中往議政府曰人君代天理物以安養斯

民為心比年以來飢饉荐至予甚愧焉茲用夙夜側身知懼顛等所言
反以予若無意於民事予惟以拘繫家人致民瘟疫則無所考劾未未
登場差人監收者不可不劾問然原其情豈私陳遵而不念予乎今欲
下問備之司劾之何如政府六曹合辭曰今顛等之言臣等所未曾聞
請下義禁府將疏內條條鞫問虛實明正其罪今舉朝請之而問備劾
實誠為未便吏曹判書許稠獨曰顛等言雖予中風憲重任宜下刑曹
論劾存中回啓 上乃下顛等狀于刑曹令問備劾實○傳旨自今濟
州子弟私進上馬依他例隨即給價○致奠于三韓國大夫人宋氏其
祭文曰死生之期固有闕於命數息義之篤即無閒於幽明云性稟
貞嘉心敦慈惠伉儷仁賢躬行勤儉閨門以肅宗族以睦篤生母后克
配皇考儀範一國以享榮養積善之厚克昌厥後予在孩提曾荷撫摩
自愛怙恃謂言永庇恒奉怡愉以至期頤夫何宿疾而致不淑欲報之
德今其已矣此心之痛曷有其極聊叙哀辭致祭殯側貞魂有知庶幾
饗之○九州原義俊使人獻土宜扇子一百把蘇木二千斤金欄一段
銅五百斤犀角二本朱折數二十片絹一十匹砂金一裹丹砂四斤檀
榔子一十斤回賜正布五百三十匹○石城管事平滿景使人獻土物

奉禮曹書曰有亮積者浮圖氏也莒州本貫而暫寓對馬一火所延五石無辨近來對馬人已得還定然亮積未得旋有母年已期願哀痛愈深扶病訴之可憐乞得生還使母子之道全之惟上達土宜鎧一領長刀二柄生絹五匹胡椒三十斤獐腦四斤土黃十筒丹木五百斤銅二百斤禮曹佐郎金填答書所諭亮積行移挨尋土宜正布八十四匹付回价○咸吉道敬差官李叔時回啓曰僉節制使李澄玉率麾下金乙信等與賊力戰斬首一級其所擄掠人畜兵仗及其賫來資械盡奪之賊後至者聞之懼而遁去 上曰澄玉雖未大捷使賊窘迫棄兵而走是可賞也○有私奴豆乙彥者年十五見良家子佛升年十一者採薪於其柴場呵禁之佛升曰天寒雪深捨此何之豆乙彥怒即以鎌刺殺之獄具當斬 上以豆乙彥年少欲原之議於政府六曹廷顯等曰此童年非大少故殺人命當依律○韓氏母賜祭欽差迎接儀注先期有司設帳殿于慕華樓西北設龍亭褥位於帳殿正中南向香亭在其前設司香二人位於帳殿外左右設 殿下祇迎位於帳殿之西近北東向設 王世子及群臣位於 殿下祇迎位之後近南東向北上又於大平館設祭文安于大廳當中南向設 殿下幄次於館門外其日 殿

下率王世子及群臣禪服以常時儀仗出幕華樓使臣將至知通禮引
王世子引班引群臣先就祗迎位合班引禮引 殿下就位率群臣躬

身

祭文入帳使臣至帳殿外下馬以祭文置於龍亭中龍亭出上路司

香二人挾侍香亭續上香龍亭南向小駐香亭在前次龍亭次使臣

殿下與使臣二時乘馬 王世子及群臣躬身 殿下過行 王世子

及群臣乘馬隨至大平館龍亭入至大廳使臣奉祭文安於案上通事

引使臣就大廳引禮引 殿下就大廳東向與使臣相對立引禮贊鞠

躬再拜興平身 殿下與使臣鞠躬再拜興平身使臣在東 殿下在

西行茶禮畢引禮引 殿下出就幄次知通禮引 王世子就大廳行

頌首再拜禮出宗室及文武一品以下以次行禮畢引禮引 殿下入

就大廳使臣在東 殿下在西設下馬宴○庚申右司諫李蟠等上疏

曰竊謂人君紀法之宗也憲司紀法之守也是則君有制法而臣乃守

之理之常也今各官守令乃於還上收納之際圖免已罪虛報其數其

欺君欺國之罪誠不小矣司憲府大司憲柳穎等職守紀法輕視其罪

請從末減欲毀成憲此豈守法之臣所當言哉伏望 殿下令攸司鞠

問其由明正其罪公道幸甚傳曰此事已下刑曹推之○辛酉命還給金

致明職牒○禮曹啓 太宗大王元敬王后位版奉安 廣孝殿儀註

前一日忠扈衛設權安幄於 廣孝殿之西東向隨地之宜有司設牀

席褥位二於幄內奉常寺先造位版二并橫至是以腰輿奉詣 廣孝

殿如練主例大祝宮闈令各奉位版橫安於褥位太宗位版在北 附廟日竦象輅進

設執事 設卓於 廣孝殿 神幄東南西向具筆現墨光漆 設盥洗於東階

東南北向獻官諸執事各具祭服謁者引獻官升自東階詣卓南北向

立大祝奉 太宗位版橫以入開橫奉出位版卧置卓上題位版官盥

手升自東階詣卓前西向立題云有明贈諡恭定太宗聖德神功文武

光孝大王墨書訖以光漆重模之待墨書乾重模 大祝奉位版納于橫中次宮

闈令奉 王后位版橫以入開橫奉出位版卧置卓上題位版官題云

彰德昭烈元敬王太后墨書訖以光漆重模之乃退宮闈令奉位版納

于橫中訖大祝宮闈令各奉位版橫入安于 神幄內南向西上謁者

引獻官降自東階出設有司辨畢有司設獻官位於東階東南西向

執事者位於其後稍南重行西向北上設監察位於殿庭之南近東西

向書吏陪其後謁者贊者位於東階西南西向北上典祀官殿司各率

其屬入奠祝板於 神位之右設香爐香合并燭於 神位前次設祭

器實饌具設尊於戶外之左訖獻官以下諸執事盥洗訖謁者贊者先
就殿庭拜位北向西上四拜訖就位謁者引監察及典祀官諸執事入
就拜位重行北向西上立定贊者曰四拜監察以下皆四拜訖各就位
大祝開橫奉出 太宗位版設於座次宮闈令開橫奉出 王后神主

設於座謁者引獻官入就位西向立贊者曰四拜獻官四拜謁者引獻
官升自東階詣尊所西向立執尊者酌酒執事者二人以盞受酒謁者
引獻官入詣 神位前北向立贊跪搢笏執事者一人奉香合一人奉
香爐謁者贊三 上香執事者奠爐于案 奉者在獻官之右奠爐在
獻官之左 盞奠盞准此 執事

者以盞授獻官獻官執盞獻盞以盞授執事者奠于神位前又執事以
副盞授獻官獻官執盞獻盞以盞授執事者奠于 王后神位前謁者
贊執笏俛伏與小退跪大祝進 神位之右東向跪讀祝文訖謁者贊
俛伏與再拜引出戶降自東階復位小頃謁者引亞獻官升自東階詣

尊所西向立執尊者酌酒執事者二人以盞受酒謁者引獻官入詣
神位前北向立贊跪搢笏執事者以盞授獻官獻官執盞獻盞以盞授
執事者奠于 神位前又執事者以副盞授獻官獻官執盞獻盞以盞
授執事者奠于 王后神位前謁者贊執笏俛伏與小退再拜引降復

位小頃謁者引獻官行終獻禮如亞獻儀引降復位執事者設飲福位於前楹外近東西向大祝詣尊所以盞酌福酒謁者引獻官詣飲福位西向立贊跪搢笏大祝北向跪以盞授獻官獻官執盞飲訖大祝受虛盞復於尊所謁者贊執笏俛伏興引降復位贊者曰再拜獻官再拜贊者曰四拜獻官四拜謁者引出謁者引監察及典祀官諸執事俱復拜位贊者曰四拜監察以下皆四拜謁者以次引出大祝官闈令納位版謁者贊者就拜位四拜而出典祀官率其屬徹禮饌闈戶以降乃退祝版瘞於坎○壬戌吏曹據兵曹關啓訓鍊觀參外祿官自前年歲末依文科三館例六品去官然文科一年二人去官訓鍊觀一年一人去官未便今後爲頭者依舊本觀六品之次西班牙六品去官從之○癸亥以柳觀爲右議政黃喜贊成李之剛參贊兼大司憲安純戶曹判書李隨吏曹參判崔士康兵曹參判睦進恭戶曹參判鄭招工曹參判李潑左軍都摠制徐選右軍摠制宋仁山執義梁活掌令金自怡成念祖持平○咸吉道都節制使河敬復報欽差指揮金聲使人賫乞糧劄付一張前來其劄付曰欽差指揮金聲爲招諭事近蒙賚奉大明皇帝勅諭將領官軍一百五十員名前往白山迤東斡木河等處招諭遼東三萬

等衛叛出軍官楊木答兀等除欽遵到於各處開讀外見行至地名東涼住劄所據官軍因往路道轉遙遠及雨水連縣中途阻滯經今月久各人原帶米糧即日缺少今照朝鮮國附近擬合行文那借接濟便益爲此前差指揮吳楨前去劄到日仰即具啟國王照依開去米數差撥人夫運送前來接濟施行計實借米一百五十石金聲所賚來勅諭楊木答兀 聖旨曰朕主宰天下上膺天命允四方萬國之人輸誠來歸者亦莫不敬順天命不敢有違爾等盡是朝廷恩養好漢比先識達天命也曾與朝廷出氣力來朝廷恩待爾等亦未嘗有纖毫虧欠前因爾等逃叛朕以爾等能順天命回來復業已三次饒爾罪過與爾官職一般任用今爾等又不曾做一些歹向當也無一些罪過不知有何緣故便輒逃去爾等恪遵朕命順着天命隨即回來安生樂業爾等一些罪過也無仍與爾官職一般任用俾爾等與父母妻子團聚快活住坐這便是爾等能順天命合天心永享太平之福若是執迷不省不遵朕言與天命相拗不即回來時大軍到來決然不饒故諭 皇帝勅諭建州左衛指揮猛哥帖木兒允察薛赤兀撒哈阿合里歹都孔可塔阿察頭目何思答千戶勸赤等徃者楊木答兀違逆天道背叛朝廷論其

罪逆天地鬼神不容及其來歸朕乃屈法伸恩特加寬宥仍與官職待
之如初未嘗有纖毫虧欠不意其冥頑無知負德辜恩仍復挈家逃竄
且又用言哄嚇良善將歸順朝廷好人一槩迫脅前去若此所爲罪豈
可容然人孰無過過而能改即爲無過茲特以勅諭爾等如果楊木荅
兀能敬順天道改悔前非輸誠來歸朕悉宥其罪仍復任用令其與妻
子團聚於本方居住自在快活享有貴富於悠久如是執迷不改爾等
即禽拿來獻以謝天人之怒朕當論爾等功賞若其中果有被其迫脅
前去能順天道來歸者亦悉宥其罪令其各安生業永享太平之福若
其怙惡不悛盡數禽拿解京正以國法故茲勅諭○日本作州前刺史
早河平常嘉使人獻土宜回賜正布八百四十匹○對馬州宗貞盛使
人獻土宜奉禮曹書曰我國人蒙恩數負雖獲還或子來父留弟來兄
留各困索居懷慕不已又專望我國先監司平將軍婦子兄弟未得被
還伏願宥恕俾令挈渾家來禮曹參議成槩荅書曰諭及平將軍道全
曾從仕我朝厚蒙國恩不致恪謹用干邦憲謫在于外非他被留人比
也茲用難以啓達并諭被留人口行移各道挨究姑將見得十一名及
土宜正布二百四十四匹就付回价○刑曹啓守令等擅殺義倉之穀數

多分給不即一一收納要免罪責每於會計以未納爲已納虛數施行
此豈志在救民其冒弄國家姦計莫甚厥罪不小雖蒙赦宥其於糾察
之任在所彈劾今大司憲柳頴其不正收正支律文明白而以淮陽府
使陳遵之罪比照輕律啓達後慮失律情見欲要改正親稟還退又欲
文過將無根未未登場差人監收拘繫家人于他官蓬頭赤脰絡繹於
道因傷獄寒多致瘟疾等事以臆度布說同僚遊辭巧飾矇矓上聰
欲免陳遵等守令之罪執義李自直掌令李孟常持平李審李堅基等
信聽柳頴無根傳說誤錯狀申俱爲不當請照律科罪命並罷職○甲
子遣前司諫柳季聞賚宣醞燒酒二十瓶往慰金聲仍賜金聲苧麻布
十五匹夏衣一襲傳旨咸吉道監司給指揮金聲酒果魚肉粳米二石
糙米一百五十石賜柳季聞夏衣一襲○傳旨今後刑決毋使宦官入
啓代言親啓○戶曹據京畿監司關啓道內各官今甲辰年先納麥爲
半上納爲半州倉收納以脩種子從之○乙丑視事○遣訓練判官朴
訥生賜鏡城僉節制使李澄玉內醞表裏夏衣一襲鞍馬又賜留防千
戶朴榮生朴貴富馬各一匹除都鎮撫金得海護軍軍人金乙辛金尚
南金元生等副司正○慶尚道處置使啓前仇良梁萬戶韓祐諸浦淑

島嶼無不詳知船上慣熟請於各浦萬戶窠闕叙用從之○濟州都安撫使進大馬二十七匹○刑曹啓私奴莫金三犯竊盜請依律絞命減一等○漢城府啓於都城內外禁山無識僧尼新造草庵因設齋席男女聚會松木及雜木盡行斫伐使禁山童秃甚爲未便請沙乙閑齋庵淨業院外草庵並皆撤去從之○丙寅視事○吏曹啓在前外方搃兵馬者兩府以上則稱兵馬都節制使三品則稱兵馬僉節制使今江原道觀察使爲三品則例當稱兵馬僉節制使然都搃一道兵馬而稱僉未便今後各道單觀察使或兼兵馬節制使則特除僉字從之○丁卯奏聞使搃制元閔生馳書啓曰五月十六日臣及到開平迤北一百餘里行在所 皇帝引見問奏本內楊木荅元詞因欲更授勅書臣奏云本人驚怕隱遁於山險地面實難禽拿遂停勅書賞銀二丁六表裏鈔五百張命錦衣衛千戶魯忠護送于燕都○命右議政柳觀刑曹判書權軫迎使臣于碧蹄○戊辰柳觀權軫回自碧蹄啓曰使臣王賢言喪主韓確宜以吉服出城門外迎命 上即遣禮曹佐郎王沽言於賢曰稽諸古禮喪主當賜祭之日以喪服出其家門再拜迎命我國已行典禮亦然今以吉服出城門外迎命如何賢曰此事何足乎朝廷所行典

禮也賜祭之家若在 皇城内則喪主家門外迎命然矣自帝所銜
命遠來致奠則不可謂將至吾家而安坐也○以都摠制李潑爲全羅
道都觀察使戶曹叅議韓有紋江原道觀察使○己巳 上率王世子
以下文武群官至慕華樓於道左躬身迎祭文韓確亦以吉服迎之祭
文過 上使判事曹崇德告于使臣曰予以凶服並行未便請先行使
臣曰何害請須並行 上乃與並行至大平館韓確先入五拜叩頭後
上與使臣再拜訖各就坐行祭禮後設下馬宴還宮○命知申事郭存
中贈使臣單衣一襲笠靴鞍馬頭目八人各單衣一襲靴及鞍馬○庚
午 上率群臣幸大平館設翌日宴還宮○遣人郊外審視禾穀○辛
未東宮設宴于大平館○判右軍都摠制府事致仕趙庸率庸慶尚道
眞寶縣人也中高麗甲寅科授典校注簿三司都事出爲雞林府判官
府有未收國貢甚多吏民受弊販營庫所儲魚物以充之又有豪家奪
民魚梁恃勢肆橫官不能禁庸至則差叅將吏收捕治之入爲同憲持平
歷成均司藝禮曹摠郎我 太祖即位授諫議大夫遷成均大司成經
筵侍講官陞刑曹典書以事免國學生負二百餘人上書請起庸爲師
特拜檢校漢城府尹兼成均大司成遷藝文提學禮曹判書藝文館大

提學皆無成均大司成及世子賓客 上覽經史有疑處輒使經筵官
就其第質問前後賞賜屢至庸自少力學博通經史尤精於性理之學
爲世儒宗學者仰若山斗爲文章操紙立就疾速如神似不經意辭意
俱到若刻意而爲者庸聰明絕人於經史一覽輒記家貧無書每借於
人覽畢輒還平生不忘少遊國學有一生新得元朝文選對策寶而秘
之不示於人庸知而借之生不許庸更請許借三日生與之庸至期乃還
曰何用此冊爲生以爲戲言耳後生讀對策庸卧其傍誦一篇不錯一
字生大驚更試他篇終前後集皆然庸事父母至誠其母病苦庸日夜
憂泣不解帶自作文以禱之病尋瘳丁父憂哀毀夜則號哭晝則擔土
成墳性勁直清儉嘗奉使上國在會同館不出房外禮部官見之曰宰
相不識賣買眞賢相也平常戒三子曰吾以不才過蒙 上恩無絲毫
報但不欺君一事自無愧矣汝輩觀吾志聽吾言念茲不喜巫覡非
其鬼不祀臨終戒子弟不作佛事平生操守如此然其性褊急無威
重短於經濟才世以此短之及卒輟朝三日官庀葬事謚文貞道德博
聞文清自守節貞子聃恥耳○傳旨咸吉道宣慰使柳季聞曰今聞前
日慶源府作賊被殺嫌進兀狄哈父兄族類五十餘名前到阿木河賊

謀難測可畏然使臣到於野人地面絕糧當及時送人問慰接濟爾其
詳審量宜布置○壬申禮曹啓令使臣賫來絹二百匹請以時直換乾

魚 從之○禮曹啓 元敬王后加上尊號儀注前期三日 殿下齋

于別殿冊使及獻官以下諸執事齋于本衙門前期二日設權安冊幄

於 廣孝殿中門外隨地之宜前期一日行預告祭用朔望祭例 晨前三刻

有司設殿下傳冊位於勤政殿月臺上中央近東西向設冊案於傳冊

位之西南向內侍二人分立冊案左右設香案於冊案前設協律郎位

於西階上東向冊使及獻官位於殿庭中央近西北向押冊官帥奉冊

函者及持冊者者在冊使之南每等異位重行北面東上設贊者二人

位於衆官拜位之北東西相向設 王世子以下文武百官位於殿庭

東西如常儀陳儀仗於殿庭內外陳樂部於百官之南陳而不作時至有司

奉冊函及祝版函置案上冊函在西協律郎先入就位 王世子以下文武

百官及冊使以下應行禮官各以常服黑帶俱就殿門外通禮門引

王世子以下文武百官入就位次引冊使以下應行禮官入就位立定

殿下常服黑帶出殿詣褥位贊禮贊再拜 殿下再拜通贊喝再拜

王世子以下衆官及冊使獻官應行禮官皆再拜近侍一人奉香合

跪進於殿下之右一人奉香爐跪進於左贊禮贊跪殿下跪通贊
喝跪衆官皆跪贊禮贊上香殿下上香近侍奠于案上贊禮贊俯伏
興平身殿下俯伏興平身通贊喝俯伏興平身衆官皆俯伏興平身
贊禮贊再拜殿下再拜通贊喝再拜王世子以下衆官皆再拜奉禮
郎引冊使獻官升自西階詣傳冊位之南北面東上知申事奉冊函以
進贊禮贊跪殿下跪通贊喝跪衆官皆跪殿下受冊函傳授冊使冊
使東向跪受西向立知申事奉祝版跪進殿下又受傳授獻官獻官
跪受向西立贊禮贊俯伏興平身殿下俯伏興平身通贊喝俯伏興
平身衆官皆俯伏興平身贊禮贊再拜殿下再拜通贊喝再拜衆官
皆再拜冊使獻官由中道出內侍奉冊案隨冊使後傳授持案者押冊
官與奉冊案者隨冊使後殿下降階至門柅送衆官皆鞠躬冊使出
門以冊函安於樓子儀仗樂部前導殿下還內通禮門引王世子
以下衆官以次出各司一員隨後至廣孝殿冊使奉冊函入詣中門
外幄次權安於案上殿司守之百官止於宮外冊使以下退就次其日
未行禮前有司設冊使以下應行禮官位於殿內庭東階東南異位重
行俱西向北上時至冊使奉冊函入自正門奉冊官隨冊使後升自中階

持案者先升置案於太后神座前

冊使以冊函跪安於案上俛伏興退降自東階就

拜位應行禮官皆就拜位贊者喝四拜冊使以下皆四拜訖冊使升自

東階就 太后神座前北向跪讀冊官詣冊案前俛伏興開函奉冊小

退東向跪讀冊訖還納函中冊使及讀冊官俛伏興退降復位贊者喝

四拜冊使以下皆四拜贊者喝禮畢以次引出有司設饌饌品用別祭例獻官

行祭如朔望儀祝文兼告○四時及臘有名日親享儀前享三日 殿

下散齋二日致齋一日允散齋不吊喪問疾不聽樂有司不啓刑殺文

書致齋唯啓享事允行事執事官及近侍之官應從升者並散齋二日

致齋一日允散齋治事如故唯不縱酒不食葱韭蒜薤不吊喪問疾不

聽歌不行刑不判署刑殺文書不與穢惡事致齋唯行享事已齊而闕

者通攝行事陪祭文武群官及諸衛之屬守衛殿門者及工人俱清齋

一宿享官以下允與祭者皆前享二日沐浴更衣陳設前享二日殿司率其屬掃除殿之內

外前一日典樂令設樂懸於殿庭近西北向通禮門設 殿下版位於

東階東南南向設亞獻官終獻官位於 殿下版位之後近南西向北

上設通贊二人位於東階之西西向若內庭狹窄則設於外庭東階西南西向設典樂位於

樂懸之北北向設陪祭宗室以下文武群官位於外庭文東武西中

心為頭異位重行俱北向設監察位二於東西班後北向書吏各陪其後殿司掃除殿之内外校書官負以祝版奉進近臣傳奉以進 殿下

署訖近臣奉出附殿司享日未行事前殿司開室整拂神幄典祀官殿

司各率其屬入奠祝版於神位之右有設香爐香合并燭於神

位前次設祭器實饌具設尊於戶外之左設福酒盞於尊所行禮享日

未行事前三刻殿司開室整拂神幄典祀官殿司各率其屬入實饌

具畢諸享官及陪祭群官皆就殿門外前二刻書雲觀報時 殿下升輿

以出權就齋殿前一刻典樂令率工人入就位通禮門分引宗室以下

文武群官入就位知通禮待亞獻官以下盥悅訖引亞獻官亞獻官非王世子

別奉禮郎引奉禮郎引終獻官入就位大祝開積奉出 太宗位版設於座

次宮闈令開積奉出 王太后位版設於座判通禮跪啓外辦 殿下

盥悅訖贊禮導 殿下入自東門侍衛不應入樂作者止於門外樂作 殿下至版位西向

立樂止贊禮跪啓請鞠躬四拜興平身 殿下鞠躬四拜興平身通贊

贊鞠躬四拜興平身在位者皆鞠躬四拜興平身贊禮導 殿下樂作

升自東階訖外降階上樂止詣尊所西向立樂作執尊者酌酒近侍二

人以盞受酒贊禮導 殿下入詣神位前戶外有揖北向立啓請跪

殿下跪近侍一人奉香合跪進近侍一人奉香爐跪進贊禮啓請三上

香進香在東西向奠爐在殿下三上香近侍奠爐于案西東向進盞奠盞准此近侍奉盞跪

進贊禮啓請執盞獻盞殿下執盞獻盞以盞授近侍奠于神位前又近

侍以副盞跪進贊禮啓請執盞獻盞殿下執盞獻盞以盞授近侍奠

于王太后神位前贊禮啓請俛伏興小退北向跪殿下俛伏興小

退北向跪樂止大祝進神位之右東向跪讀祝文訖樂作贊禮啓請

俛伏興再拜興平身殿下俛伏興再拜興平身樂止贊禮導殿下

出戶樂作降自東階復位樂止知通禮引亞獻官升自東階詣尊所西

向立樂作執尊者酌酒執事者二人以盞受酒知通禮引亞獻官入詣

神位前北向立贊跪亞獻官跪執事者以盞授亞獻官知通禮贊執盞

獻盞亞獻官執盞獻盞以盞授執事者奠于神位前又執事者以副

盞授亞獻官知通禮贊執盞獻盞亞獻官執盞獻盞以盞授執事者奠

于王太后神位前知通禮贊俛伏興小退再拜興平身亞獻官俛伏

興小退再拜興平身樂止引降復位奉禮郎引終獻官行禮如亞獻儀引

降復位執事者設飲福位於前楹外近東西向大祝詣尊所以盞酌福

酒授近侍贊禮導殿下樂作詣飲福位西向立近侍奉盞北向跪進

贊禮啓請跪受盞 殿下跪受盞飲訖近侍受虛盞復於尊所贊禮啓

請俛伏興 殿下俛伏興贊禮導 殿下降復位樂止啓請鞠躬再拜

興平身 殿下鞠躬再拜興平身通替贊鞠躬再拜興平身在位者皆

鞠躬再拜興平身贊禮啓請鞠躬四拜興平身 殿下鞠躬四拜興平身

通替贊鞠躬四拜興平身在位者皆鞠躬四拜興平身贊禮啓禮畢導

殿下還齊殿樂作出門樂止知通禮引亞獻官奉禮郎引終獻官出

通禮門分引陪祭宗室以下文武群官以次出典樂令率工人出大祝

宮闈令納位版典祀官殿司各帥其屬徹禮饌闔戶以降乃退祝版瘞

於坎 殿下升輿還宮行事執事官亞獻官王世終獻官正一典祀官

奉常寺大祝內宮闈令內侍應奉官近侍承政贊禮從二判通禮通禮

通替門攝行則行事執事官獻官一品典祝官奉常寺大祝文官宮闈令

內侍謁者外贊者外贊引外齋郎外監察朔望祭則無樂懸○癸酉

上以禫服率百官出御正殿南幄次行禮訖傳 元敬王后加上尊號

玉冊左議政李原奉玉冊平壤府院君趙大臨奉香祝詣 廣孝殿各

前一負侍衛將以朔祭垂獻玉冊也○傳旨判利川縣事讓寧大君安

世宗莊憲大王實錄 卷第二十四

大正...

...

...

...

...

...

...

...

...

...

...

...

...

...

世宗莊憲大王實錄卷第二十五

秋七月甲戌朔加上 元敬王太后尊號其王冊文曰至恩莫報徒切

愴懷徽號是崇式勤歸美茲率彝典聿嚴令規恭惟稟資貞嘉操行敬

順心專坤厚彰懿德於宜家道配乾元昭盛烈於定社載闡關雎之化

遂致麟趾之祥伏念幸賴丕庥叨承景緒爰謹殊稱之獻用伸永慕之

誠謹奉玉冊加上尊號曰 彰德昭烈元敬王太后仰冀淑靈俯垂明

允播鴻休於萬世貽燕謀於億年○乙亥 上率百官詣 廣孝殿以

禫服行 太宗恭定大王禫祭祭文曰假哉 皇考德配昊天丕贊

聖祖流慶綿綿念惟眇質叨襲洪基至恩莫報弓劍忽遺日月如流已

踰再期禫辰又屆哀慕益深庸薦薄奠展我孝忱庶幾右之優錫顧歆

○禫祭儀註前期通禮門設 殿下版位於東階東南西向設亞獻官

終獻官位於 殿下版位之後近南西向北上執事者位於其後異位

重行俱西向北上設執禮位於東階西南西向謂者贊者贊引在南小

巡俱西向北上若內庭窄狹則設贊者位設宗室以下文武群官位於

外庭文東武西中心為頭異位重行俱北向宗室於道西在前設監察位二於
東西班後北向書吏各陪其後典祀官率其屬奠祝版於靈座之右有

陳幣篚二於尊所設香爐香合并燭於靈座前次設祭器實饌具設

尊於戶外之左在玄酒皆加勺在酒篚北向西上設洗於東階東南北向在東

有盤洗在西疊在洗東加勺在東篚在洗西南肆實以巾若爵洗之篚則亞終

獻洗又於東南北向盥洗在東爵洗在西若王世子亞盥洗於終獻洗之西有盤西疊在洗東加

勺篚在洗西南肆實以巾若爵洗之篚則又實以爵設諸執事盥洗於亞終獻洗東

南北向時至典祀官帥其屬入實饌具畢諸享官及陪祭群官皆就殿

門外判通禮導殿下升舉以出權就齋殿即座執禮帥謁者贊者贊

引先就殿庭拜位重行北向西上四拜訖各就位贊引引典祀官大祝

齋郎入就殿庭拜位立定執禮曰四拜凡執禮有辭贊者皆傳唱典祀官以下皆四

拜訖贊引引諸執事詣盥洗位盥洗訖各就位通禮門分引宗室以下

文武群官入就位謁者引亞獻官若獻則王世子亞引終獻官入就位大祝

開匱捧出大王神主設於座覆以白紵巾宮闈令開匱捧出王后

神主設於座覆以青紵巾大王神主在西執事者詣爵洗位洗瓚拭瓚洗爵拭

爵置於篚捧詣尊所置於坫上禮曹判書進當齋殿前跪啓請行禮啓

訖俛伏與判通禮導殿下出齋殿請版位西向立判通禮啓請四拜

哭殿下四拜哭盡哀執禮曰四拜哭在位者皆四拜哭盡哀先拜者

判通禮導 殿下詣盥洗位北向立內侍跪取匱與沃水又內侍跪取盤

承水 殿下盥手內侍跪取巾於篚以進 殿下悅手訖內侍受巾奠

於篚判通禮導 殿下升自東階近侍內侍從升詣尊所西向立執尊者舉罍

酌鬱鬯近侍以瓚受酒判通禮導 殿下詣 靈座前北向立啟請跪

近侍一人捧香合跪進近侍一人捧香爐跪進判通禮啟請三上香近

侍奠爐于案近侍以瓚跪進判通禮啟請執瓚灌池訖以瓚授近侍近

侍受以授大祝近侍以幣篚跪進判通禮啟請執幣獻幣以幣授近侍

奠于 靈座前九進香進瓚進幣皆在東西向奠壺受又近侍一人以

幣篚跪進判通禮啟請執幣獻幣以幣授近侍奠于 王后神座前判

通禮啟請俛伏興再拜導 殿下降自東階復位小頃判通禮導 殿

下升自東階詣尊所西向立執尊者舉罍酌酒近侍二人以爵受酒判

通禮導 殿下詣靈座前北向立啟請跪近侍以爵跪進判通禮啟請

執爵獻爵以爵授近侍奠于 靈座前又近侍以副爵跪進判通禮啟

請執爵獻爵以爵授近侍奠于 王后神座前判通禮啟請俛伏興小

退北向跪大祝進 靈座之右東向跪讀祝文訖判通禮啟請俛伏興

再拜導 殿下降復位謂者引亞獻官詣盥洗位北向立盥悅訖謂者

引亞獻官升自東階詣尊所西向立執尊者舉罍酌酒執事者二人以爵受酒謂者引亞獻官詣靈座前北向立贊跪執事者以爵授亞獻官亞獻官執爵獻爵以爵授執事者奠于靈座前又執事者以副爵授亞獻官亞獻官執爵獻爵以爵授執事者奠于王后神座前謂者贊俛伏興小退再拜引降復位謂者引終獻官行禮如亞獻儀引降復位判通禮啟請四拜哭殿下四拜哭盡哀執禮曰四拜哭在位者皆四拜哭盡哀禮曹判書跪啟禮畢啟訖俛伏興判通禮導殿下還齋殿謂者引亞獻官終獻官出通禮門分引陪祭宗室以下文武群官以次出贊引引典祀官以下諸執事俱復拜位立定執禮曰四拜典祀官以下諸執事皆四拜贊引以次引出大祝官闈令納神主如儀執禮帥謁者贊者贊引就拜位四拜而出典祀官帥其屬徹禮饌祝幣瘞於坎群官移班近東班首進名奉慰尚衣院上吉服及鞍馬王世子以下文武群臣皆服吉服還宮禮曹又上世子殿鞍馬文武群臣入庭陳賀○大提學卞季良啟曰柎廟之日設彩棚百戲一國盛事士女聳觀群臣獻壽動樂使臣或使頭目往觀之且本國人心素不密使臣知之必矣臣謂請使臣設宴可矣否則謝以不能往見之由庶得賓主之禮

不然非所以敬王人也。上曰：然則予當以行祭身勞，不能往，見爲
辭季良乃退。上更議於政府六曹左議政李原，以季良之言爲不可。
乃止。星山府院君李穆聞之，以爲迎使，臣設宴可矣。○對馬州宗彥六
之母使人謝賜米豆，仍獻土宜，回賜正布八十匹。對馬州左衛門大郎
使人獻柑橘，裁五十。○平安道監司報建州衛指揮玉古只千戶童觀
音老等男婦共二十六名，持牛馬於江界滿浦口。子江北皇城平來屯
言曰：原居回波江方州等處，爲因韃靼兀狄哈侵耗，前年受聖旨搬來
婆猪江等處，爲飢餓覓糧而來，欲上京謁。殿下內言都司李滿住領
軍人四百餘戶到鴨綠江相距一日程，瓮村等處有解朝鮮語一女云：
我本居咸吉道，被擄而來。此野人等冰凍則欲越江乞口糧種子，難待
冰合之日，命下議政府六曹議之。同議啓曰：彼人接待一依去四月二
十七日受教行移處置，若乞糧料，則以斗升給之。云：減我軍料濟乏，若
帶軍器成羣而來，則一依永樂二十年六月受教，逃來唐人接待例。邊
將固守不許入境。若越入作賊，臨機應變。此建州衛軍人非咸吉道來
往彼人之例，實與遼東東寧衛人無異。諭以無。皇帝聖旨而相接，未
可也。勿令越入。從之。○丁丑使臣王賢具祭物，賜祭韓確母金氏于

其第其祭文曰 皇帝遣內官王賢諭祭于妃母金氏之靈曰惟靈出自名家配于令族性資端淑內助維嘉篤生賢女作嬪宮闈政宜共享安榮茂迎壽祉胡爲嬰疾遽爾告終撫念親親寔深感悼茲特遣人祭以牲醴靈其不昧尚克享之 皇妃謹遣內官王賢致祭于母金氏之靈曰惟我母氏鞠育劬勞德厚恩深莫克酬報女以弱質選嬪宮闈仰荷 皇上恩眷享有富貴隆加賚錫榮及一家方期我母益臻眉壽永享康寧詎意一朝溘然長逝追惟存沒豈勝哀痛茲特遣祭用表微忱靈其如在伏惟鑑歆○戊寅知申事郭存中將命往大平館言於使臣曰我 殿下以初六日拊廟祭致齋昨日始患痢疾將以十二日改擇行祭茲用久未得見命小臣問安且云乾魚適以不時不得貿易於市且市裏之物不可進獻 殿下將國庫所儲進獻豈敢受其價王賢曰聞近者國有大事 殿下致齋過此乃可得見 殿下日命大臣問安又饋盛饌日四雖不遣近臣問慰何歉於心且 殿下之疾夏節常事若未即愈更賜通諭乾魚貿易 皇帝不是於 殿下傳 聖旨命臣將絹子貿易於市耳 殿下雖欲以國庫所儲進獻吾何敢賫價而還 殿下至誠吾已知之○己卯遣內官金淳饋內膳于使臣○宗親駙

馬設慰宴于使臣始用樂○辛巳奏聞使元閔生通事朴淑陽先來啓
曰 皇帝謂元閔生曰老王以至誠事我至於乾魚無不進獻今小王
不以至誠事我前日求老王所使火者乃別求他官以送朕老矣食飲
無味若蘇魚紫蝦醢文魚須將來進權妃生時凡進膳之物惟意所適
死後凡進膳造酒若瀚衣等事皆不適意內官海壽立於 帝傍謂閔
生曰將兩箇好處女進獻 帝欣然大笑曰并將二十以上三十以下
工於造膳造酒侍婢五六選來賜閔生銀一丁綵段三匹 上曰前日
火者事予非不知 皇帝之怒也然今此言欲得處女而發歟即召政
府六曹共議命禁中外婚嫁置進獻色以判敦寧金九德判漢城具陞
禮曹判書申商爲提調○傳旨進薦銀口魚平魚文魚廣魚大蝦令各
道趁節漁捕如法乾曬使醃淡適中○甲申 上服絳紗袍遠遊冠率
群臣詣 廣孝殿望 廟四拜訖還次于壽康宮幄次群臣各就依幕侍
衛○賜祭 太宗配享功臣于其家祠堂祭晉山府院君文忠公河崙
教書 王若曰元首股肱旣共成其大勲始終存沒宜配享於萬世此
古今之令典而國家之恒規惟卿嶽瀆英靈樑棟大材學際天人識通
經緯鎮定擊撞巍乎泰山之崇重涵濡巨細廣矣滄海之包容遂冲而

有守正直而無華惟根本培植於內者確乎不拔故措諸事業者綽乎有餘既樹功於定社之時又與盟於佐命之日大爲我太宗所倚重自歲庚辰秉國鈞主文衡四爲上相益展嘉猷允可以尊主庇民者靡不設施克盡經濟之各以收弼亮之效二十年間民殷物阜措國家於盤石之安况復奉使中朝上章專對天子是嘉錫命撫封苟非識時知變者能若是乎真可謂命世之才王佐之器也今將附我太宗于宗廟也廣詢配享之臣僉曰卿我允協予意是用俾卿從祀廟庭於戲嘉乃丕勲永難忘於沒世享茲明祀宜勿有於終天祭漢山府院君忠武公趙英武教書王若曰訏謨定命實將相之殊勲崇德報切乃帝王之令典惟卿天資英毅器宇宏深秉性忠勤懷蹇蹇匪躬之節持身巖重有落落古人之風苟可利國而安民率皆委質而竭力嘗從太祖永肩一心回軍之時參舉大義開國之際克成奇功歲在戊寅權姦相依幼孽是挾禍機不測國步斯危乃能仗義以協謀遂致定難而反正天倫復叙宗祏再安逮夫庚辰亦有大姦潛圖不軌離間我宗室動搖我邦家卿又臨亂出奇推誠佐命雖當倉卒之際不失處置之宜奸人於是乎伏誅王業以之而永固宜居太宰之位無任三軍之權原

其終始恒乃心於王家益効忠於 皇考今當祔 廟之舉廣詢配享
之臣僉曰卿哉肆躋配於 太宗期從祀於萬世於戲嘉乃丕績愈永
久而難忘相我 先王豈幽明之有間祭右議政翼景公鄭擢教書
三若曰興一代之治必有一代之英材立萬世之功宜膺萬世之異寵
此古今之公論而國家之恒規惟卿閱之門纓紱之胤以明體適用
之學懷濟世安民之略當麗季自絕之時遇我 太宗于潛邸首建大
策推戴我 聖祖化家爲國開億載之鴻圖其隆功偉烈固帶礪而難
忘加以戊辰之歲姦臣構亂又與群公仗義戡定以安 宗社卿於我
家實與唐室之裴劉宋氏之石高無以異也今茲祔我 太宗于 宗
廟也廷議配享之臣以功以德如卿幾人是用俾卿配食 廟庭以教
大功於戲嘉乃丕績庸作祀以褒崇指我 先王庶咸休而篤弼祭完
山府院君襄度公李天祐教書 王若曰宣力効忠克著人臣之偉績
紀功作祀實爲國家之恒規惟卿以宗室之親爲干城之將勇足以禦
侮智足以運籌嘗戊辰權奸挾幻之時奮義戡定及庚辰潛構閱牆之
日協謀削平以正嫡庶之名以昌國家之業左右 昭考終始一心蔚
有豐功咸在盟府今屬 太宗之祔廣詢躋配之臣惟時僉言允孚予

意是用從祀庸示服功於戲念茲殊勲以慰九泉之壯魄相我 皇考
與享萬世之精禋祭鷄城君景節公李來教書 王若曰絢義佐命克
成不世之勲崇德報功當示非常之寵惟卿稟性純粹燭微明拓歲當
庚辰奸臣懷詐陰誘宗親離間骨肉謀亂邦家禍在不測卿以芳幹之
戚忘私絢義先事首告式遏奸凶載寧宗 社以著臣子之大節克紹
乃父之高風苟非忠義之實蘊於中而形於外者其能若是哉英名偉
績播在盟辭盍登從祀以酬膚功爰當祔廟之辰特陞配食之列於戲
念爾茂烈實永世而難忘相我 太宗庶終天而勿替○乙酉行告祭
于廣孝殿祭訖 神輅進發 上服袞冕乘輦率群臣前導至宗廟祔
廟仍行秋 享大祭令孝寧大君補奉安位版於 廣孝殿行秋享並
如儀其 宗廟一室祝文曰時維七月庸薦菲儀制終三年奚舉祔禮
翼垂歆顧庶諒孝思二室曰聿遵舊典庸舉祔儀奚值新秋式陳祀事
庶垂英顧歆允孝思三室曰德深垂裕實啓丕基時值精禋庸舉祔禮
庶諒歆允優錫保持四室曰節屆秋嘗式陳祀禮蕪新祔爰舉禘儀
翼諒孝思優垂歆顧五室曰孟秋方屆庸薦精禋舊典是稽聿嚴新祔
仰惟英鑑俯借顧歆六室曰祔期載屆適當嘗祭之辰舊章是遵庸舉

精禮之典庶其歆顧綏我孝思其配享五功臣教書 王若曰英偉之
之才萃爲一代之碩輔勲勞之績當享萬世之明祠茲當躋祔之辰盍
舉記功之典惟文忠公河崙氣鍾山岳學際天人智足以燭微量可以
輔世能謀善斷蔚然宰輔之材蒼色淵光展也文章之伯嘗注意於
皇考起潛龍於在淵君陳之嘉謀嘉猷黼黻王道山甫之令儀令色軌
範朝端喜怒不形毀譽徒然惟忠武公英茂稟性忠直器宇宏深德本
仁清肅肅安民之器才兼將相堂堂鎮國之英方麗運之已窮知天命
之所在翊戴我 皇祖遂成開創之功左右我 太宗聿致隆平之治
豈惟邦家之彥所謂杜稷之臣惟翼景公鄭擢稟氣真純秉心忠厚巍
然世族之胄偉矣儒雅之宗開國之勲溢於史策佐命之績耀於邦家
民心飽於具瞻勲勞宜於厚報惟襄度公天祐服事左右奔走後先義
膽忠肝扶持 宗社英姿銳氣讐服奸兇竭力盡忠勲名夙著折衝禦
侮國步以寧特受 皇考之知蔚有維城之望惟景節公李來耿介拔
俗瀟洒出塵謙議忠言早承家訓清風高節超出古人炳幾摛忠徇義
佐命功加于時德垂後裔嗚呼生而資其力以成其業則死當躋其祀
以酬其功非惟國家之良規實乃古今之通義惟我 皇考昔在麗季

翊我 太祖化家爲國及其卽位治具畢張庶事成熙治功軼古禮樂文
物粲然大明燕翼貽謀垂裕萬世此雖天祚盛德之致亦由卿等輔相
惠迪之功予惟仰成嘉乃丕績嗟我 皇考奄至禮陟攀號未幾寒暑
易更祥禫已終三年之制有同駒隙哀慕之念終天不窮爰擇吉辰用
祔 清廟仍爲卿等躋于配位以答元勳幽明雖殊感通伊邇苟不與
享於萬世安能報功於九泉於戲有猷有爲奏膚功於一世以妥以侑
當血食於千秋 上還齋殿釋袞冕服絳紗袍遠游冠乘輦還宮結彩
棚陳雜戲成均學生及教坊皆獻歌謠 上御勤政殿受賀禮仍降上
尊號教書及宥旨其教書 王若曰報本莫大於尊親爲治無加於立
孝式稽古昔詆告臣民恭惟我 皇妃元敬王太后靜體坤元明儺乾
健有儆戒相成之道無險詖私謁之心在歲戊寅值維城之將毀佐我
皇考集不世之大勳逮夫正位中宮益嚴內治彰河洲之淑德嗣渭
涘之徽音予以眇躬載纘鴻業方仰承於慈訓痛遠促於神游匪薦殊
稱曷昭盛烈於永樂二十二年七月初一日謹率百寮奉玉冊加上尊
謚曰彰德昭烈元敬王太后備舉彌文之禮用伸歸美之情於戲檢玉
泥金既已正名而奉冊由親及遠尚期歛福以錫民咨爾有衆體予

至懷其宥旨 王若曰宅憂三祀庵經祥禫之期廟食萬年肇舉蒸嘗
之享展上儀於 大室敷煥彌於明廷恭惟我 皇考太宗恭定聖德
神功文武光孝大王英明天縱仁孝生知佐我 太祖化家爲國武定
禍亂文致大平隆功峻德卓冠百王 皇妃彰德昭烈元敬王太后位
正中宮母儀東土德已媿乎興周功有光於提甲三宗首稱於無逸姜
姬播詠於生民以今况古異世同符予以眇躬嗣守丕基永言孝思恪
遵釋典於永樂二十二年七月十二日乙酉躬服袞冕祗奉 皇考皇
妃神主附于 大廟陳有楚之儀奉惟馨之薦祖有功宗有德行洪祚
於無彊見乎位聞乎聲肅威靈之如在庶彌文之具輯粵神意以潛孚
屬值奉先之日宜推及物之恩可大有境內自永樂二十二年七月十
二月昧爽以前除謀叛大逆歐殺祖父母父母妻妾殺夫奴婢殺主蠱
毒魘魅謀故殺人但犯強盜子之於父妻之於夫奴之於主謀殺未成
情跡已著外已發覺未發覺已決正未決正咸宥除之敢以有旨前事
相告言者以其罪罪之嗚呼致敬盡禮聿伸報本之誠發政施仁其底
惟新之治賜宴 宗廟秋享大祭享官諸執事及永寧殿享官諸執事
于議政府○前此大提學卞季良上議曰爲之後者爲之千古也恭惟

太宗爲恭靖王之後則太宗乃恭靖王之子也今殿下於
恭靖當稱孫而遷翼祖於永寧也無疑矣臣嘗面啓獲蒙俞音而
事未施行臣竊疑焉謹按春秋文公二年書有事于大廟躋僖公傳之
者曰躋僖於閔之上也夫閔公年未十歲即位又不數年而薨民不見
德僖公入繼大統非親授受在位三十餘年蓋魯之賢君也且僖公尸
也閔公弟也臧文仲之升僖於閔於人情似矣孔子乃謂縱逆祀又特
書簡冊曰躋僖公嗚呼非聖人莫能修之其爲此類也夫三傳及胡氏
皆以僖公父視閔公爲義蓋從聖人之特筆也考之成周廟制則孝王
乃共王之弟也孝王祔而某遷于武世室則兄弟之相繼者爲父子而
異昭穆者周制然大宋之制太祖太宗某某皆兄爲穆而弟爲昭矣
程子謂爲人後者謂所後者爲父母謂其所生者爲伯父此生人之大
倫天地之大義不可得而變易者也但魏晉以來兄弟同一室而同始
穆者有之然非周制也非聖訓也韓愈謂魏晉以來事非經據不可施
行者此亦可見臣竊謂幼而學之壯而欲行之也稽之上古則成周之
制如彼證諸近代則大宋之制如此質諸聖經則孔子之特筆也參之
賢傳則程氏之格言也翼祖之當遷永寧殿下之當稱孫於

恭靖所謂考三王而不繆建天地而不悖質鬼神而無疑百世以俟聖人而不惑者也伏惟 殿下斷自宸衷特命稱孫於 恭靖仍遷 翼祖於永寧則合於周宋之制乎於聖賢之訓矣且 恭靖與 太宗又非若前世泛然爲兄弟者之比也歲庚辰 恭靖以無嗣欲封 太宗爲世子其時大臣獻議者以爲宜封 王太弟 恭靖不可曰直以此弟爲子遂冊封爲世子布告中外臣嘗觀宋鑑續編英宗二年四月詔議崇奉濮安懿王典禮司馬光奮筆曰爲人後者爲之子况前代入繼者多宮車晏駕之後援立之策或出臣下非如陛下親爲先帝之子然後繼體承祧光有天下政與我朝之事相類其時右光之議者王珪范鎮呂誨范純仁趙瞻呂大防傅堯俞等也遂劾韓琦爲不忠又劾歐陽脩以首開邪議陷陛下於過舉載在簡策昭晰後世則 殿下之當稱孫自有大宋故事且 定安王后先 恭靖薨 太宗以父在爲母期服齊衰十三日而釋服 恭靖薨 太宗服斬衰二十七日而釋服 殿下則以孫爲祖服服衰十三日而釋之則 殿下之當稱孫非自今日而始也其時 太宗命臣等議稱子稱弟臣以爲當稱子議竟不行然考之史策未見其有紀焉唯 太宗及我 殿下斬衰齊衰之制則見

於金墩之史筆章章明甚豈天陰佑朝鮮欲正天地之大義生人之大倫
故或泥其事或壽其傳歟惟 殿下斷而行之衆議駁之竟不行○戶
曹啓今使臣將中絹五匹緜布一匹屬平安道監司曰絹三匹欲換安
息香絹二匹緜布一匹欲換石燈盞若從其請則後未難繼辭以此物
本道罕貴以時價貿易苧麻布與之 從之○丙戌奏聞使摠制元閔
生回自京師○上請使臣迎入勤政殿設溫斟宴始奏樂贈使臣鞍馬
使臣還館上移御于昌德宮○以趙庸卒輟朝三日前此以秋享致齋
未啓遣內官吊賜賻紙八十卷燭十條○進獻色啓大小兩班處女但
令盲人巫女陳告未便乞令時散東西各品陳告自己女子及兄弟族
親女子限七月十八日外方各官有奴婢大小品官鄉吏各戶處女令
其道觀察使親監選擇移文其中隱匿不告者以年歲相准色惡他女
代出者一依丁酉年例以 王肯不從論罪家產沒官告者充賞有科
田者許人陳告適受不用心考察守令及各道都觀察使並令抵罪
從之○丁亥親傳望祭香祝○遣內官金富儲內膳于使臣○禮曹判
書申商啓令十五日君臣同宴適值趙庸停朝請更消日 上欲停之
商曰 殿下三年之喪旣畢又行祔 廟大禮群臣咸欲獻壽 殿下

停之舉國臣子罔不缺望請以十六日行之 從之○禮曹啓對馬州
守護宗貞盛等請還人口請以兵曹倭案載錄倭人三十一名內遐道
住九名隨後入送京中京畿忠清慶尚等道住十二名遣知印推刷送
于乃而浦交割其中願留者留之 從之○司憲府啓謹按元六典一
款士大夫於聽訟之官出納錢穀之司私通書狀顛倒是非耗竊官物
其弊不小一皆痛禁外官贈遺亦皆痛禁違法授受者皆不廉論今前
朝之習猶未盡革京外官吏不遵成憲私通書狀將官物公然贈送甚
爲未便乞自今一依六典痛禁違禁與者受者並皆計贓按律科斷以
勵士風 從之初 上以大臣朝士多有受賂者欲嚴立禁防令尹淮
製教召領議政柳廷顯星山府院君李稷左議政李原大提學卞季良
吏曹判書許稠禮曹參判李明德使知申事郭存中傳教曰前朝之
季賄賂公行舊習猶存京外官吏以官物公然贈賄恬不爲恠其中有
不肯受贈者則反遭譏誚由是賊吏相繼得罪予甚憫焉觀律文內但
有以官物與人之罪無受人贈遺之律故今欲立法使受者與與者同
罪特下教旨乎令攸司啓聞立法乎廷顯等啓曰如此等事啓聞立法
攸司職也原曰今憲府以臣爲受人所贈故臣於此事不敢可否廷顯

因戲曰如我老僕於受膳餘香脯河害李良綢亦曰食物贈受似乎無妨何必并禁存中入啓出謂原曰并公言啓達已悉原謝而出時趙璠王孝乾崔世温李之實犯賊見劾大臣及朝士受賂連累者頗多左議政李原受世温豹皮之實表紙亦被憲劾原因擬議自解以謝之於是命下憲府申嚴贈賄與受俱罪之法○上聞使臣將以十九日發程遣知申事郭存中請留使臣曰我志已決然 殿下既以厚待又請留如此吾將二十一日發程矣○戊子兵曹啓使臣回還時乾魚物入盛積子一百六十其擔持軍人以各驛牛馬及附近各里居民量宜抄出送從之○傳旨京畿忠清全羅慶尙江原黃海平安咸吉道監司曰自今進肉膳於壽康宮 太宗後宮在焉○己丑命放徒流付處人八十四又命放赦金孝孫任龜年許仲崔崇沆崔自温尹仁甫趙玄璣申浩金以仁全敏權希達潘石老林秀等十三人又命李懋李叔福金自温梁汝恭李安柔宋乙開蔡知止等七人外方從便此罪在不宥而特原之者也○上宴群臣于廣延樓 王世子宗親駙馬議政府六曹叅判以上功臣及大提學卞李良判府事韓長壽六代言侍宴其餘時散宰樞及侍臣賜宴于仁政殿南廊各司皆於朝房賜宴有司進卓領議政柳

廷顯進爵群臣皆北向跪命群臣各就座醉歡終日而罷群臣詣仁政
殿門外謝恩○遣知申事郭存中告使臣曰今進獻魚物所掌官司錯
計未滿一萬斤予即命其司充一萬斤又加二百斤王賢喜云我於
皇帝奴也 殿下子也至誠備獻喜無可比○庚寅視事○遣知甲事郭
存中贈使臣貂裘使臣感謝曰既賜鞍馬又賜貂裘頂戴不起○司憲
府兼大司憲李之剛等上疏曰臣等竊謂人臣之罪莫大於不忠不忠
之罪不在於蒙宥權希達奉使天庭詆毀本國以累 上德其爲不忠
甚矣罪不容誅特蒙 聖上好德之德只流于外得保首領臣子猶有
憾焉今者並蒙恩宥臣子所共憤也 殿下斷以大義還置竄所終身
不齒以快臣民之憤公道幸甚不見○議政府六曹慰宴使臣○傳旨
今後向化新來人田租限三年徭役限十年蠲除○辛卯視事○遣內
官金富饋內膳于使臣○宜山君南暉奸卒漆原府院君尹子當妾左
軍婢閔伊一日閔伊歸從姊家暉妬且怒至其家毆打姊及夫幾至殞
命 上聞之召暉責之曰連宗室者宜自念吾於國家有何功德享此
富貴尤當戒慎以保安榮汝於戊戌歐打朝官以致憲司上疏請罪予
從寬典肆宥不論又於壬寅公主有疾予乃軫慮遣人問疾汝則不知

病證與宦官六博殊無家長之意且尹子當妾婢閨伊服夫喪未滿百日遂以爲妾雖常家妻妾尚不可如此况老功臣之妾乎今又歐打無罪之人幾至於死何其狂悖若是汝歸家非有吾命雖鄰里毋得出入仍命收丘史召左軍都事崔澄曰軍婢閨伊以大臣之妾夫歿未幾更適他夫理宜重論然宥前之事姑置勿論其定於苦役○吏曹啓各道守令只兼勸農兵馬無管學二字唯二品以上外官與兼鎮守令及平安咸吉兩道兼翼守令并帶管學二字一般守令稱號不同未便自今外方守令只兼勸農兵馬勿下管學二字從之○賜祭于卒判右軍都摠制府事致仕趙庸其教書王若曰敷教興化固有資於碩儒崇德尊賢宜特加以恤典惟卿山川間氣奎壁英精既研討於經書又博覽於子史識通古今學際天人其談論淵淵乎心性之源其訓誨表表乎忠孝之道展也文盟之主允爲儒者之宗 聖祖簡知 昭考寵眷敷歷華秩展布雅懷由窮理而智益明隨任使而職斯舉予初嗣服卿未至衰方臨泮宮之時首講洪範之義敷陳至論啓沃良多遂進資於崇班願詳延於舊德胡天不憖俾予興哀爰命禮官式陳薄奠於戲死生之故卿既知理數而無疑息禮之施予敢以幽明而有間○壬辰遣知

申事郭存中問安于使臣仍贈苧布十匹麻布二十五匹衣一襲靴一
雙人參十五斤滿花席四張滿花寢席二張石燈盞一事賜頭目八人
各麻布二匹衣一領靴一雙世子遣左翊衛許誠回贈使臣細麻布六
匹王賢感喜贈存中黑氈衣誠羊角帶○上幸太平館設餞宴○傳旨
犯罪人負職牒收取以各品爲等實爲未便今後每以正從爲差其曾
收職牒者亦依此例計除其餘職牒還給○蕪大司憲李之剛等上疏
曰臣等前日將希達不忠之罪具疏以聞未蒙俞允深有缺望臣等竊
謂人臣犯不忠之罪而得保首領亦已幸矣反蒙恩宥還至京師安然
在家無異平昔則犯不忠者無所懲矣潘石老敢發不忠之言林秀侮
慢王子之罪尹仁甫私附倭使之罪兩係匪輕亦當不赦等蒙赦宥非
惟臣等一國臣民所共憤也伏望 殿下俯從申請斷以大義將上項
人等並逐前所公道幸甚右司諫李蟠等上疏曰臣等竊見書曰青災
肆赦又曰刑故無小蓋人之所犯過誤則赦之故犯則不可赦也今權
希逵奉使上國揚說不忠不道之言自毀本國使 殿下事大之誠幾
乎掃地倘或上國知之則固非細故也其不忠之罪誠有類乎反逆而
非青災之可赦者也且禮曰凡附於棺者必誠必信勿之有悔焉耳申

浩於太宗山陵之日不謹厥職殊無誠信之意其大不敬之罪亦不可赦今皆赦宥臣等竊恐此非刑故無小之意也伏望 殿下將希達申浩等勿令肆赦以懲後來皆不允○前都觀察使李貴山率依他例致賄○癸巳視事○郭存中將麻布二匹許誠將白苧布一匹回奉于使臣曰此物甚薄但以土產贈之王賢謂存中曰儘力備辦魚物且數數往來勞動吾以薄物贈之耳何欲受此回奉存中等固請之賢曰君等敬我所以敬 皇帝也我之敬君等所以敬 殿下也欣然受之○留後司宣慰使權軫發程○慶尚道監司進白銀四劬乃咸陽人姜松所得也命以國庫米量宜償之○進獻色啓今處女選揀時宗室親戚及前朝王氏向國人關係國家罪人女子勿并選揀從之○京畿江原道程驛察訪啓各官驛吏令所在官守令開具根脚并子孫名字年歲依平民戶口例以本驛稱爲本貫各給戶口案置簿四件一件兵曹一件監司營一件各其官一件各驛丞藏置如有逃避者考其戶口案即還本處無戶口案者永屬公賤其逃亡驛吏許人定限陳告不告各人及不用心考察當該官吏及付籍後逃避者與許接隣里正長依曾降教旨施行又各驛轉運急走奴婢根脚名字生產置簿及逃亡奴婢推

考亦依上項例施行從之○甲午 上率群臣幸慕華樓餞使臣遣左
議政李原贊成黃喜知申事郭存中餞于碧蹄驛又遣仁順府尹趙啓
生伴送于義州○禮曹啓驥興府院君禮葬時但有石羊石虎而無墓
表誌石今三韓國大夫人宋氏禮葬依貞善公主例有墓表誌石請府
院君表誌於夫人表誌并錄之從之○乙未視事○盲人朴連等二十
六上言病人各以琴瑟爲業以資生理近因國喪停樂難以過活命各
給米一石○禮曹啓處女隨從火者慶尚全羅忠清江原道各二名京
畿黃海道各一名令其道監司擇年十五歲以上二十歲以下可使者
治粧及時給驛上送從之○丙申平壤宣慰使李隨發行○戊戌以許
權爲中軍摠制元胤左軍摠制柳李聞左司諫金泮右獻納趙遂良曹
尚治左右正言○義州宣慰使成抑發行○賜藝文館大提學卞季良
禮曹參議成槩鞍馬領敦寧致仕權弘馬季良撰獻陵碑文槩書弘篆
額○分遣進獻色別監及內史于各道選處女○賜送酒肉于讓寧大
君○已亥視事○垂大司憲李之剛等上疏曰臣等將宜山君南暉濫
刑之罪具辭以聞不賜俞允實有憾焉臣等竊謂書曰欽哉欽哉惟刑
之恤哉夫刑者人命所關聖人所重雖所當加之刑尚有欽恤之心豈

有私忿而濫刑者乎今者南暉寅緣宗室固當心存敬畏謹其身圖報上德乃其事也不勝一己之忿敢犯冒夜之行密使伴人可生遣于王子避方之家諍引重寶等人枉法加刑幾至死亡其狂悖不敬孰加於此釋此不罪則爲臣不敬者無所懲矣伏望 殿下斷以大義依律科罪以戒後來國家幸甚不允○兵曹啓兵船外面施薄板隨其鱗食改之則可用二十餘年姑將劍船一艘外施薄板試其快鈍從之○司贍署提調啓楮貨本非民樂用之物今因銅錢兼用之令楮貨尤不行用宜當速頒銅錢以定民志鑄錢可行條件具錄于後一自癸卯十一月至今七月鑄成之數不過四千五百七十貫雖盡今年未滿一萬貫楊根分署鑄錢匠三十名今加三十名量加助役人且限銅錢周足停軍器監月課於柴炭有餘處又加置爐冶五十所給鑄錢匠五十名助役人一百名今本監官負與署提舉別坐一同監造且慶尚全羅道亦停月課軍器加爐冶鑄錢一鑄成雖多鍊正功役爲難除兩面鍊正務令孔方外圖重適一錢一分署及慶尚全羅道鑄錢所不定日課之數未便每一名一日上手二千文中手一千六百文下手一千三百文從之○庚子 上御便殿慰宴驪川府院君閔汝翼漢平府院君趙滄

竟日而罷汝翼廬侍 大妃三年消廬侍 太宗三年故設宴慰之孝
寧大君補恭寧君裊敬寧君裊義平君元生順平君群生清平府院
君李伯剛平壤府院君趙大臨判府事韓長壽太卿權永均兵曹判書
趙末生禮曹叅判李明德五代言侍宴○忠清道監司進進獻表紙九
十六卷擣鍊紙四十八卷○辛丑御經筵始講孟子○兼大司憲李之
剛等上疏曰臣等將宜山君南暉狂悖不敬之罪再疏申請而 殿下
特以私恩不賜俞允臣等深有缺望不忍緘嘿竊謂爲人臣而罪在不敬
法所不赦法者天下古今之所公共非 殿下所得而私也且有罪而不
罰則非徒賞罰不明狂悖不敬者必無忌憚矣今暉雖至頑愚亦知其
不敢爲也而恣行私忿敢逼王子避方之所其不敬甚矣伏望斷以大義
明置於法以戒後來 上曰來二十九朝啓見大司憲詳言之○李之
實尹慶州人己之贓八十六貫憲司按律請斬之 上欲減等杖流吏
曹判書許稠啓曰古者刑不上大夫罪雖至死有賜死而無戮辱今之
實之罪賜之死則可矣杖之未便 上議於政府僉曰刑不上大夫雖
是美意賜死之榮豈若杖而生全之爲愈也於是命減一等除刺字流
于光陽○慶尚道兵馬都節制使進新鑄錢三十二貫命今後除上進

直納司瞻寺○壬寅視事御經筵○親傳朔祭香祝○傳旨戶曹限鑄錢周足頒行除慶尚全羅道講武別進上方物○斬明火強盜今晉同吾麻大皆京畿臨江縣賊也○戶曹啓淮陽任內瑞和春川任內伊布合屬于附近隣蹄縣淮陽任內方山春川任內亥安合屬于附近楊口縣從之○八月癸卯朔咸吉道大雨傷禾○甲辰上慮水灾命內史金貴巡行近郊審禾穀○紙造所進以竹葉松葉蒿節蒲節四色冊絲共四百六貼下鑄字所○傳旨兵曹今當禾穀成熟雨水過多天變可畏東宮造成伐石軍罷役○乙巳御經筵○親傳社稷及風雲雷雨祭香祝○知申事郭存中承命與政府六曹聚京中處女于議政府取二十八人以司直禹疇女子爲首○上親選處女侍從各司婢子○丙午上御便殿選處女二十八人○右司諫李蟠等上疏曰臣等竊謂諫行言聽此人君之美德近日憲府將宜山君南暉所犯再三申請終不蒙允其於殿下從諫聽言之美何臣等竊念夫婦三綱之本今暉得尚公主位已極矣寵已至矣宜當謹慎圖報上德之萬一曾不是願嘗在公主享世之日奪人之妾于憂服之中婢不終夫之喪及今公主下世喪未及期餘哀未忘之時也曾無憂戚之心縱其荒淫之行

遂因妾之逋逃追入黃得龍之家毆打得龍恣行忿欲觀其縱欲忘哀之心則其在平時毗愛其妾踈薄公主雖當病篤之際而無憂慮之情因可知矣其不念太宗君父之德又不思聖上親親之恩以毀三綱之本明矣且得龍之家王子避接之處也而今乃搔擾其家使王子不得安處是豈重金枝而敬聖上者乎其不敬之心不可不懲也伏望 殿下依憲司所申以戒後來以彰聽諫之美 不允○忠清道監司進進獻表紙八十八卷擣鍊紙七十二卷○丁未視事御經筵○親傳社稷祭香祝○城門都監啓咸吉道北青府所築都城頽落請令當初北青監役官及頭目捻牌及時來京修築從之○戶曹啓將司贍寺已鑄錢四千五百七十八貫計用銅三萬五千七百六十五斤以此例之則一萬貫所鑄銅七萬八千八百八十八斤十萬貫所鑄銅七十八萬一千八百七十七斤今考現在銅不過一萬斤雖加設爐冶七十所無銅可鑄其斂銅合行事件具錄于後一京中各司會計付銅九萬一千斤內先送三萬斤及常鑼與爐甘石于鑄錢所一於時散各品差等收銅以所鑄錢量宜分給一京外公處銅器一皆定限收納一京外犯罪收贖者並贖以銅一京外經師巫女業稅以銅差等收納一歷

代銅錢散在民間者一皆收納一銷錢爲銅者以爲鑄錢論從之○刑
曹啓丹陽民張石大故殺人律當斬從之○戊申受朝視事○忠清
道監司進進獻表紙八十卷擣鍊紙四十八卷○賜送馬一匹鷹三連
于讓寧大君仍傳旨判利川縣事曰令讓寧五月一放鷹若越境或踏
損穀田作弊於民隨即以聞○傳旨江原黃海咸吉平安等道近因失
農民不蘇息來九月朔番上侍衛軍別牌勿令上送○司僕提調啓前
此咸吉道良馬多產者乃因開原路相通與韃靼馬孳息今與開原不
通已五十年矣韃靼馬絕種且濟州雖產馬之地體大性馴者不產將
來可慮願令慶源鏡城居人於童猛哥帖木兒等處以其所求之物交
易體大雌雄種馬孳息使益於是傳旨咸吉道都節制使曰於童猛哥
帖木兒處品好韃靼雌雄種馬以營中之物如其界軍民私市者而市
之即將匹數毛齒啓聞○刑曹啓謀殺妻本主奴四龍請依律凌遲處
死從之四龍昌原侍衛軍黃思進婢夫也斬歐父私奴仍邑金咸吉
道咸興府人也初仍邑金馬逸入父田食禾父讓之仍邑金怒摔父仆
之踞於腹以足趾踢之○己酉傳旨詳定色銅錢作貫其數太多則贖
罪之人傾家破產必不能充太少則盜財物者其數雖少必至死刑誠爲

可慮參考古制仍考數歲之中物價量宜作貫或以正布或以木縣等物計准其價務令輕重得中○庚戌御經筵○議政府六曹判書知申事觀處女子議政府擇取七人乃前未擇處女也○戶曹啓東西各品品銅差等收合正從一品十勛正從二品九勛正三品八勛從三品七勛正從四品六勛正從五品五勛正從六品四勛正從七品三勛正從八品二勛正從九品權務一勛前銜正從一品九勛正從二品八勛受田前銜正三品七勛從三品六勛正從四品五勛正從五品四勛正從六品三勛正從七品二勛正從八品一勛正從九品至權務八兩無受田前銜正從三品五勛正從四品四勛正從五品三勛正從六品二勛正從七八品一勛正從九品權務八兩受祿致仕正從一品九勛正從二品八勛受祿檢校資憲以上七勛嘉善以上六勛叅議五勛無受祿致仕正從一品八勛正從二品七勛無祿檢校資憲以上六勛嘉善以上五勛叅議四勛三品三勛四品二勛五品一勛六品十兩七品九兩八品八兩國巫堂九勛前國巫堂八勛松嶽巫堂八勛德積巫堂六勛三聖巫堂六勛內乘巫堂八勛紺嶽巫堂九勛巫堂一勛上經師八勛副經師六勛前上經師六勛經師三勛外方官經師二勛經師一勛堂巫

女二勛巫女一勛各官守令教官檢律教諭渡丞驛丞館丞萬戶千戶
鹽場官各從散官京中收納外方恒居三品以下各品及巫女業中各
其道監司行移收納其中收自願納者亦皆收納○辛亥 御便殿監選處
女十人○壬子視事御經筵○吏曹判書許稠啓公私婢子嫁良夫所生
母得從父爲良 不允○傳旨工曹近因失農民生不得蘇息各道各
官城子倉庫外一應營繕及已前教下公衙客舍鄉校造成凡干土木
之役並皆停寢○吏曹啓童蒙必賴師長嚴加勸課乃可成才故
累曾教授各部學堂教訓之法有云當惜分陰不可一日放過其教官
輪番直宿夙夜講勸有云學官罷仕後蒙童散亂戲謔不肯讀書自今
學官一負給朝夕食輪次竟日仍坐不離考察其立法之嚴如此今學
堂教官或因停朝陪祭與夫衙日暇日而不坐蒙童廢學之日爲多或
作或輟悠悠度日有乖立法之義自今各部學堂教官勿論停朝暇日
常仕且於衙日及陪祭後必須復坐嚴加敦勸 從之○傳旨咸吉道
各官安葬外家墳墓今後有修補處則各其所在官傳報監司擇日修
補毋使子孫爲之○癸丑 御仁政殿受朝御便殿視事經筵○禮曹啓
去庚子年使臣禮部郎中趙亮賚來 恭靖大王賜祭犧牲及癸卯年

禮部郎中揚善賚來 太宗恭定大王賜祭犧牲皆用騶羊豕館伴議
政府叅贊黃喜問犧牲何用騶揚善荅云 雄牲有腥不肥大故凡圓丘
宗社之祭牛牲外皆用騶兼言擇牲預養之法尤詳其後判書申商入
朝質問禮部曰祭用騶牲無乃乖於體完曰牲之義乎主事陳俊荅云
支體有虧謂之不牲可也欲精潔肥膏作騶何嫌於不完若雄性非獨
不用於祭享與御膳庶人亦不食乞依中朝之制大小祭享羊豕並皆
作騶預養其騶割之餘依文公家禮揚復附註凡祭肉鬻割之餘皮毛
之氣勿令殘穢藝慢之制須即埋瘞 從之○進讎校高麗史其序文
曰史法古矣自唐虞已然稽諸書可見也列國史官各記時事後之纂
述者得有考焉若夫漢祖入關使蕭何收秦籍唐宗即祚命魏徵撰隋
書鑑前世廢興之故為後王善惡之師所謂國可滅而史不可滅者詐
不信夫恭惟我 太祖開國之初即命奉化伯鄭道傳西原君鄭摠修
高麗國史於是採摭各朝實錄及檢校侍中文仁公閔漬綱目侍中文
忠公李齊賢史略侍中文靖公李穡金鏡錄彙而輯之倣左氏編年之
體三年而成為卷三十有七顧其書頗有舛誤至於凡例以元宗以上
事多僭擬往往有所追改者我 主上殿下聰明好學留心典籍乃命

右議政臣柳觀藝文館大提學臣卞季良及臣淮等重加讎校正其訛
謬永樂二十一年十一月二十八日臣觀上言前朝自太祖而下皆稱
宗僭也然惠宗定宗皆廟號今新史改稱惠王定王以廟號爲謚猶似
失其真乞依實錄太祖稱神聖王惠宗稱義恭王定宗以下皆書本謚
庶幾不誣事實是日臣淮入侍經筵面奉玉音若曰孔子之春秋則托
南面之權成一王之法故吳楚僭王貶而書子賜葬成風王不稱天筆
削與奪裁自聖心及左氏作傳則荆吳於越一從其自稱而書王未嘗
有改若朱子之通鑑綱目雖曰本春秋書法而其分註則僭偽之邦盜
竊名號亦皆因其實而錄之豈記事之例不容不爾也今之秉筆者既
不能窺聖人筆削之旨則但當據事直書褒貶自見足以傳信於後不
必爲前代之君欲掩其實輕有追改以喪其真也其改宗稱王可從實
錄廟號謚號不沒其實凡例所改以此爲准臣等恭承明命遂將元宗
以上實錄比較新史如改宗爲王節日爲生日詔爲教朕爲予赦爲宥
太后曰太妃太子曰世子之類復從當時實錄舊文編摩旣訖事跡粗
完開卷瞭然勸懲斯在臣竊惟司馬子長負邁世之氣紬石室之文作
史記百三十篇抑揚去取自成一家然必有褚少孫附其闕司馬貞救

其訛而後其書乃備于長尚爾况其下者烏得無待於刊正糾謬者歟
作史之難也雖校之否已也如此 殿下之慮深矣至於面命之辭出
于宸衷之獨斷明白正大非尋常淺見所能測其涯涘者謹拜手稽首
筆之於書冠諸卷端以告後之君子覽者宜致詳焉同知春秋館事尹
淮所撰也○甲寅慶尚道監司進進獻表紙四百四十四卷擣鍊紙四
十四卷○乙卯 上以淺淡服烏角帶行秋夕祭于 獻陵議政府六
曹堂上臺諫各一員侍衛○戶曹啓京外各品所納鑄錢銅於司贍一
署難以監收請分於事歇各司定日收納其定日不納者京外相推不
納者倍徵 從之○丙辰親傳望祭香祝○傳旨承政院自今自外啓
達事如肅拜小事外須面囑承傳色啓達毋使司謁傳傳啓達自內傳
教事亦須承傳色親傳然後聽受施行其或承傳色承內教不親自宣
傳使司謁代宣或代言司啓達事不即親到聽受入啓隨即啓達○丁
巳 上率百官行秋夕祭于廣孝殿始用樂 上曰前日 獻陵及今
日祭雖小節略無差失予甚喜焉○御經筵○斬崔世溫初世溫知德
川郡盜官物計贓四十貫絀給飢民賑濟米計贓五十七貫於是憲司
劾而請之 上曰此人盜用賑濟米致民飢死非他贓吏比遂誅之○

雨雹于江原道伊川縣咸吉道文川郡京畿朔寧揚州傷禾穀○戊午
受朝視事仍與朝啓群臣設小酌○咸吉道都節制使啓慶源百戶金
自忠通事洪大等因候事變到童猛哥帖木兒所回言謙真兀狄哈巨
乙加哈與子四人麾下三十餘人到童猛哥帖木兒家與欽差金聲飲
酒巨乙加哈詰聲曰 皇帝賜我之物當與我也彎弓欲射聲聲曰予
奉 皇帝聖旨招諭楊木答兀而已無有賜汝之物然恐其被害與木
絲三匹廣綃一匹針一百箇朱紅一封白蛤一百箇弓絃一條匹段帖
裹一領然後巨乙加哈置弓箭又為四子強求贈物金聲不得已各給
木絲三匹朱紅一封針一百箇白蛤一百箇弓絃一條受之乃還○刑
曹啓斬歐本主奴莫同金康忠清道清安縣住金升道逃奴也○己未
傳旨黃海道監司進獻紫蝦醢擇極精潔者藏貯具其數以聞○庚申
視事御經筵○工曹據平安道監司關啓道內本無磁器匠中國使臣
來往支應器皿甚為不潔乞以忠清道各官才熟磁器匠二名送于本
道傳習燔造 從之○戶曹啓東西兩學堂設立未久未受菜田依南
部學堂例各給菜田一結二十負 從之○兩雹于咸吉道安邊○刑
曹啓斬明火強盜金永時長守平安道中和郡賊也斬謀殺本主奴金

叱同仇望濟州鎮撫咸仁德家奴也斬謀殺妻奴宋存者初存者私水
原女妓藕花香其妻孝道在京家衣粧稍麗欲奪而贈藕花香計無由
一日送僕馬給妻曰主家近設神祀不可不來妻信之盛服赴主家存
者邀於路無人處盡奪衣粧絛而棄之壑俄而妻復蘇事覺存者伏誅
○禮曹啓去庚子年進獻紙三萬五千張剩餘紙四百張今進獻紙二
萬五千張剩餘紙三百二十張封裹從之○辛酉御經筵講孟子畢○
咸吉道北青府虫色青白如三眠蠶甲山郡及平安道江界府隕霜○
命給自願侍衛女真金劉時應可家舍奴婢衣服家財鞍馬糧料○刑
曹啓斬毆殺人奴豆乙彥○壬戌御經筵始講詩○議政府六曹選京
畿留後司處女○戶曹啓失農各官救荒草食因無定數多或至於廢
事小或失於荒政自今大戶六十石中戶四十石小戶二十石殘戶十
石定爲恒數以豫實爲先考察預備其農事稍稔各官不必拘數隨宜
儲備從之○判晉州牧使李安愚卒致賻○進獻紙賫進官工曹參議
朴冠辭紙劄槽子捲一百五十八賜毛冠衣一襲笠靴及藥就差通事
中軍副司直艾儉管押被倭擄漢人孟斗保解遼東又差通事趙忠佐
解被擄逃來漢人孫貴等男婦共六名賜孟斗保孫貴等七名口各衣

一雙笠鞋帶梳苧麻布各一匹○平安道各官隕霜傷晚穀○癸亥江
原道隕霜○受朝御經筵○御便殿選揀處女○上召領議政柳廷顯
左議政李原諭曰六曹堂上或因觀察外方不具其位春秋講武令六
曹隨駕則恐或廢事今後講武則政府二員兵曹臺諫隨駕門外小行
幸則只令兵曹隨駕何如然此非與卿等議之特曉予意於卿等耳廷
顯原對曰 皇帝雖門外行幸六部皆令扈從入君舉動不可輕易大
駕在外臣僚安然在內於義未安願令臣僚皆得隨駕以爲後法 上
曰雖令大臣扈從若狂悖之君不聽大臣之言盤遊無度何以止之廷
顯原對曰苟立其法後世中主可以據此止之且不與大臣俱行脫有
及時擬議之事誰與決之 上曰然則門外行幸臨時與閑暇大臣偕
行○教旨大明律制書有違條云凡奉制書有所施行而違者杖一百
失錯旨意者減三等律文本意但指官吏奉行而言非謂常人犯法
者也近來法司照律皆失其旨凡有誤犯一時王旨禁令者例以制書
有違論決予惟先王用刑期于無刑豈忍以無知之民重置之於法乎
一答一杖尚失其中召怨傷和或基於此自今有犯王旨禁令者除合
該奉行見任官更外大小人民雜犯各以本律科斷毋得似前比附有

所失入一遵古昔制律之本意以副寡人欽恤之至意○戶曹啓各道各官修築堤堰自辛丑年立法令損實敬差官檢察以後更不考舉甚爲未便請令今年損實敬差官詳加檢舉置簿上送從之○傳旨戶曹江原道連年失農人物流移民生可慮各官貢案付貢物令各司計一年所支與見在之數今甲辰年所納量宜蠲減○咸吉道監司報去七月二十八日欽差指揮金聲使送通事黃顯等九名賫指揮劄付來督未盡輸運糧米七十八石其劄付曰欽差指揮金爲招諭事照得近蒙齋捧勅諭將領官軍前來白山迤東翰木河等處招諭叛出官軍楊木荅兀等除欽遵到於各處開讀見在東涼住劄招諭外爲官軍急缺糧食已經行文前去朝鮮國鏡城節制使轉達借支去後續蒙敬差宣慰使柳季聞部民送到糧米七十二石其餘未曾運至今該官軍所給前米即目將及食盡若不催督誠恐臨機缺食不便擬合再催爲此專差百戶王歧等賫去劄付到日即便照依原令事理將未到米數作急差撥入夫星火運送赴營接濟施行請勿遲誤遂輸米七十八石發軍人五十名護送○九州作州刺史平常嘉使人獻蘇木一千觔硫黃一千觔丁香五十觔麝香三十觔白檀十五斤犀角三本金欄一段象牙一本銅

二百劬鈔二十劬回賜正布三百四十四匹○日本國大宰府宗右馬近
江守茂世使人獻土宜○筑州刺史藤源滿貞使人獻金欄一段羅一
段光絹二匹生絹十匹摺扇一百把槓榔子一十劬土黃二十筒胡椒
一十劬犀角二頭朱盤大小四十片銅五百劬蘇枋一百五十劬紅絹
一段大刀十把黃丹五劬回賜正布五百五十四匹○傳旨慶尚江原咸
吉道監司進獻年魚大口魚卵醢欲於九十月間進獻須令鹹淡適中
精究沉造上進○刑曹啓平安道孟山住軍人李莫同妻寶背忌厭其
夫疾病絞殺罪慶尚道咸昌住前陵直金格家奴李奉毆殺格子長福
罪俱律應凌遲處死從之○甲子江原道隕霜○視事御經筵○刑曹
啓斬強盜金龍李元金難龍慶尚道晉州囚元全羅靈光囚難江原道
金城囚也○丙寅忠清道監司進進獻表紙五十四卷擣鍊紙三十三
卷○丁卯御便殿選揀處女○千秋使總制李蕺回自北京○戊辰受
朝視事○司諫院啓前此受職人負造臺諫之家親告世系故朝謝得
以署經無滯自臺諫家禁人私通以後新來從仕者祖系憑考無門或
滿五十日不得出謝今後每下批後曾經臺省政曹人負外受職人開
具四祖單字送于臺省憑考出謝從之○傳旨典農寺東西藉田所收

拒黍十七石三斗內三斗春米進上十七石藏之以備來歲種子○傳
旨京畿監司以果川國庫米二十五石貸讓寧大君秋成以租還收○
黃海道黃州地震○刑曹啓全羅道順天府有名升才者寄居于姪女
夫船軍朱卜來家年老眼盲又顛狂卜來厭之與妻古邑珠謀去之有
僧志玄到家給云吾叔苦其老病發願燒身僧曰生而燒身來世得福
卜來夫妻與其子朱同甫升積柴置升才其上令志玄誦經燒之按律
朱卜來古邑珠罪謀殺總麻以上親皆斬朱同甫升罪從而加功絞僧
志玄罪造妖言斬命志玄犯在赦前放赦朱同甫升杖一百流三千里
朱卜來及妻古邑珠依律○刑曹啓斬強盜私奴勿加伊每邑金金干
皆平安道咸從囚也○斬毆父金臣義臣義平安道定州住前郎將金
乙玄之子以父不給黍稷田所出罵而毆之○左副代言李臺被劾于
憲司是日知申事郭存中右代言金孟誠右副代言李臺同副代言鄭
欽之在院當食掌令梁活進啓本立于闕庭代言使別駕告以當食
之故後因醉而忘至暮乃悟臺出而受啓本且不禮活怒告于本府執別
駕取辭因劾之○已巳御經筵○上進郭存中金孟誠李臺鄭欽之教
曰吾以爲汝等各謹乃職今觀所爲予之計失矣臺諫予所敬重何爲

至此無禮存中對曰臣等昨將以明日時享各歸其家以此相勸酒忽醉而不覺失也上曰致齋必如此乎予豈不知易置汝四人今若一黜雖欲見我不可得也憲司之論請予亦以為不切也昨日之失專在知申事與同副一為行首一為房掌憲司論此二人不亦可乎李臺少不更事但當日入直耳知申事與同副年非幼少且多諳鍊而如此可乎予自太宗以來未見所司執闕內人而取招也今聞之終夜不寐存中泣下對曰臣等之罪實深重也惶恐流汗

上曰今後毋得如此命皆出仕○庚午 上幸景福宮御慶會樓觀入直內禁忠義別侍衛司禁司

僕鎮撫等騎射楊洽崔浚之金孝至三發三中賜弓各一○前掄制曹

瑗卒于慶尚道昌寧之私第致賻○辛未視事御經筵○上召大司憲

李之綱等引入于內諭以代言筆失誤事和解之○宗廟第六室四時

大享通行祝文乾坤覆育未報至息日月推遷不勝永慕茲值孟春之

畚式陳禋祀之儀朔望祭時物兼薦通行祝文哀慕罔極誠切奉先著

存孔昭禮虔陳祀茲當月朔之奠兼薦時物之羞朔望祭兼告講武通

行祝文哀慕罔極誠切奉先著存孔昭禮虔陳祀况值于狩之日益深

必告之思肆展菲儀兼薦月朔○壬申親傳朔祭香祝○御經筵○御

便殿親講訓練觀兵書習讀官○政府六曹選忠清慶尚道處女遣知
申事郭存中賜內醞于議政府○禮曹啓學堂生徒非成均館生徒
徒居齋之比每日朝夕往來今新設西部學堂於慈恩宗京庫僻在北
部一隅遠處學生朝夕往還爲難乞罷京庫移於西部中央軍器監西
空地實爲便益從之○京畿朔寧楊州雨雪傷禾○九月癸酉朔平安
道監司金自知啓使臣支應差使負判三登縣事朴得年回自遼東賞
膳寫 皇太子令諭一本其文曰 皇太子令諭天下文武官負軍民
等仰惟 大行皇帝爲天下生靈討賊胡寇班師回至榆木川不幸於
七月十八日賓天遺命中外臣民喪服禮儀一遵 太祖高皇帝遺制
布告天下咸使聞知王賢與得年潛說 皇帝與韃靼相遇交兵阿朮
大戰死頭目李英云忠勇王自請招安韃靼扈駕而行未知去向 皇
帝行在所雨冰如瓦軍人或折臂或碎頭而死馬亦多折項而死 皇
帝以此勞心而崩○禮曹啓去七月十八日 皇帝升遐今九月初一
日以素服黑角帶烏紗帽舉哀初四日成服初七日除服自舉哀日至
釋服日停朝市去刑戮斷音樂禁屠殺禁婚嫁停大小祀且喪服一依
洪武三十二年爲 太祖高皇帝喪禮京中四品以上外方大小使臣

守令著衰服其餘各品官吏以白衣烏紗帽黑角帶終制沿邊將帥及軍官不用此例從之。上為。太行皇帝率群官舉哀如儀。○太行皇帝舉哀儀註前期有司設闕牌於勤政殿當中南向設香案於其前設殿下褥位於月臺上北向通禮門設宗室以下文武群官位於殿庭文東武西中心為頭異位重行俱北向設監察位二於東西班後北向書吏各陪其後宗室以下文武群官皆著白衣烏紗帽黑角帶詣勤政門外。殿下出思政殿著白衣烏紗帽黑角帶即座判通禮免伏跪啓臣某言請殿下為。大行皇帝舉哀通禮門分引宗室以下文武群官入就位判通禮導。殿下詣褥位北向立啓請鞠躬拜與拜與拜與拜與拜與殿下四拜通贊唱鞠躬拜與拜與拜與拜與宗室以下文武群官皆四拜判通禮啓請哭。殿下哭十五舉聲通贊唱哭宗室以下文武群官皆哭十五舉聲判通禮啓請哭止與平身。殿下哭止與平身通贊唱哭止與平身宗室以下文武群官皆哭止與平身判通禮啓請四拜。殿下四拜通贊唱四拜宗室以下文武群官皆四拜與平身判通禮啓禮畢通贊唱禮畢判通禮導。殿下入內通禮門分引宗室以下文武群官以次出成服儀註前期有司設闕牌於勤政殿當中南向設香案於

其前設 殿下褥位於月臺上北向通禮門設宗室以下文武群官位
於殿庭文東武西中心為頭異位重行俱北向設監察位二於東西班
後北向書吏各陪其後宗室以下文武群官皆服衰服詣勤政門外
殿下出思政殿即座判通禮俛伏跪啟臣某言請 殿下為大行皇
帝成服尚衣院進衰服 殿下釋素服服衰服通禮門分引宗室以下
文武群官入就位判通禮導 殿下詣褥位北向立啟請四拜 殿下
四拜通贊唱四拜宗室以下文武群官皆四拜判通禮啟請哭 殿下
哭十五舉聲通贊唱哭宗室以下文武群官皆哭十五舉聲判通禮啟
請哭止與平身 殿下哭止與平身通贊唱哭止與平身宗室以下文武
群官皆哭止與平身判通禮啟禮畢通贊唱禮畢判通禮導 殿下
入內通禮門分引宗室以下文武群官以次出舉臨儀註自成服後至
釋服每朝有司設關牌於勤政殿當中南向設香案於其前設 殿下
褥位於月臺上北向通禮門設宗室以下文武群官位於殿庭文東武
西中心為頭異位重行俱北向設監察位二於東西班後北向書吏各
陪其後通禮門分引宗室以下文武群官入就位判通禮導 殿下詣
褥位北向立啟請四拜 殿下四拜通贊唱四拜宗室以下文武群官

皆四拜判通禮啓請哭 殿下哭十五舉聲通贊唱哭宗室以下文武
群官皆哭十五舉聲判通禮啓請哭止與平身 殿下哭止與平身通
贊唱哭止與平身宗室以下文武群官皆哭止與平身判通禮啓禮畢
通贊唱禮畢判通禮導 殿下入內通禮門分引宗室以下文武群官
以次出除服儀註同上儀 上入內釋衰服宗室以下出外釋衰服○
命退回各道處女及火者並皆給驛○甲戌 上命知申事郭存中曰
太祖皇帝遺詔天下臣民喪服三日而除此為州縣吏民而言朝廷
必不如此君臣終始之義至重 大行皇帝之喪予不忍三日而除且
古禮外廷行易月之制宮中實行三年之喪今群臣三日而除予則三
日後權着白衣視事至二十七日即吉近臣亦宜二十七日而除其令
領議政柳廷顯星山府院君李稷左議政李原右議政柳觀大提學卞
季良兵曹判書趙末生吏曹判書許稠禮曹判書申商叅判李明德同
議以聞稠商明德等議云 上教皆是廷顯稷原觀季良末生等議云
二十七日而除是古之禮文且 殿下為君之誠甚厚然 太祖高皇
帝遺詔天下臣民三日而除今 大行皇帝遺詔亦曰中外臣民喪服
禮儀一遵 高皇帝遺制時王之制不敢不從 上是廷顯等議然竟

行二十七日之制○戶曹啓請遣司直金允河於全羅慶尚道司直金
有知於黃海平安道於產銅各官巡行採取試驗從之○乙亥禮曹啓
今上爲 大行皇帝喪服請依文公家禮斬衰之制製造從之○丙子
上爲 大行皇帝服斬衰文武群臣四品以上服齊衰望闕拜哭如儀
○全羅道監司報道內樂安郡土城低微萬有倭變難以保守乞以雜
石稍廣舊基城之從之○禮曹啓爲 大行皇帝進香祭文用長廣厚
白紙書寫依表箋封裏例用畫金黃色筒畫金黃綃袂袂從之○丁丑
上率群臣向闕四拜哭臨○命給自願侍衛向化女眞李於乙於取
睦加乙獻等家舍衣服鞍馬奴婢口糧○戊寅 上率群臣向闕四拜
哭臨○己卯 上率群臣向闕四拜哭臨釋喪服 上與近臣著白衣
烏紗帽黑角帶羣臣即吉○以李稷爲領議政柳廷顯領敦寧韓劍領
敦寧致仕崔迤判右軍都摠制府事曹恰 中軍都摠制李皎中軍摠制
申槩判晉州牧事○傳旨吏曹永樂二十一年六月立法前已除拜留
守府正四品少尹府州牧正五品判官考滿拜京官時追計初授日月
依他例陞品除授○吏曹啓世子左右正字各一左右副正字各二加
設在侍直之上從之○傳旨禮曹 大行皇帝發喪後二十七日前停

朝會宴享用樂○刑曹啓全羅道順天戶長林頓戶婢莫莊竊樂安住
徐義乳兒抱養林頓以爲不可認良爲奴令莫莊父朴松還其家朴松
負歸至中路棄之巖石間以石壓殺按律莫莊以設方略而誘良人當
一百徒三年朴松以故殺人當斬從之○兵曹啓安不忘危軍國所急
大閱之法已曾詳定受教請擇今九月下旬吉日聚東西各品及成衆
愛馬當番甲士防牌受田無受田牌當番侍衛別牌大閱從之○庚辰
視事○傳旨平安咸吉道監司進獻石燈盞擇品好石精細造作來進
○順平君群生上言 仁德殿即位時賜給願堂華藏寺田地二百結
上昇後分一百結移賜於 厚陵齊宮興教寺今華藏寺見革其餘一
百結并於興教寺給之命下戶曹如上言施行○傳旨平安道監司前
日入送進獻紙劄并櫝子皆於平壤淨室牢藏毋使損污○刑曹啓斬
殺人強盜奴古音龍慶尚道陝川囚也○辛巳視事○進獻紙賫進官
工曹叅議朴冠行至平安道安定驛還來○工曹啓請令曹知印率匠
人金獨大往鈇鐵產出平安道泰川嘉山成川殷川黃海道海州谷山
瑞興遂安江原道金城慶尚道金海昌原大丘安東任內春陽忠清道
瑞山等各官覓爐甘石從之○命加賜領敦寧致仕安天保科田七十

結○濟州都安撫使進國牧場騮馬三百六十四○刑曹啓斬明火強盜徃毛知平安道江東囚也○壬午 上率群臣以白衣烏紗帽黑角帶并陳慰表及進香祭文樂部陳而不作賜進香使崔迺陳慰使安純各自緜布袂衣一領鴨頭綠絛紬襦衣一領毛冠靴其陳慰表曰欽惟大行皇帝崩逝伏惟 皇帝陛下哀痛切至臣某竊以昊天不惠仙馭上賓計發一朝悲纏九土伏惟 皇帝陛下攀慕罔極聖情難居願抑哀思俯從中制臣無任痛悼屏營之至謹奉表陳慰以聞進香祭文曰謹遣陪臣判右軍都摠制府事崔迺以清酌大宰之奠敢昭告于 大行皇帝神御座前伏以於皇 太祖統一萬邦重華協帝景運益彰文德武烈覃被要荒日月所照莫不梯航二十餘載宇內平康自我先父偏荷寵光逮至臣身特蒙卯翼思報毫毛昊天罔極耿耿臣衷上有天日豈意一夕八音遽過迹縻東藩阻叅哭擗瞻望雲霄摧裂心曲敢叙哀思遙薦菲薄於昭在上庶其降格伏惟尚饗禮物白銀四錠重二百兩白細苧布一百匹黑細麻布一百匹○兵曹啓大闕時左右廂中衛中所所用二十八宿旗二件十二神旗二件大燾二中燾十二小燾八令軍器監造作輸送從之○傳旨兵曹京畿抱川峯所里永平白雲山

開木洞清溪洞加平蘆站高飛洞等處國用材木所在之地山直差定
禁人斫伐所在守令無時考察○癸未視事○刑曹啓斬強盜奴裴益
天奉所乙進任敬守成敏天龍歸守鄭龍皆右議政鄭擢陳告補充軍
爲奴者也共謀背主火擢清州農舍奪家財在逃至是被獲伏誅○甲
申御經筵○兵曹啓大閱陣圖儀註五衛各有五色去辛丑年親閱五
衛只服青黃赤白黑色之衣非徒有乖於陣圖畫形每於變陣之際曲
折未得分辨一依陣圖畫形令各衛各有五色從之○乙酉視事○丙
戌講武支應使啓今秋等講武時禁令條件一除都差使負令所在官
守令檢舉支應諸事一司僕馬匹勿論郊穀草喂養一司饗司僕忠扈
衛尚衣院諸負母得擅毆各官供給吏民如有違誤於代言司進告一
侍衛大小軍士馬匹散草各宿所預積雖有不足毋得民間收斂一京
畿咸吉平安黃海道進上於行在所其他各道進上京中一不得已水
深處橋梁外毋修理道路一其道監司首領官及所過守令外各官守
令毋得越境來進一隨駕各驛馬從發京三月後給料一上項事件外
監司守令民間收斂隱密人情者使隨駕察訪無時搜捕論罪從之○
丁亥咨文賫進官僉知司譯院事趙忠佐欽錄新 皇帝即位詔回自

遼東賜忠佐冬衣一襲忠佐遼東往返共十四日賞其行之速也○命給女真金劉時應哈李於乙於取陸加乙獻等三名夫妻各冬衣一襲笠靴鞋○戊子江原道江陵襄陽杆城暴風以雨傷禾○己丑上命同副代言鄭欽之同三省及義禁府提調鞫問盧致等○吏曹啓在前大臣之卒榮贈考勲司一負賚至喪家自今依唐制及本朝六典考功司掌之○司憲府啓在前議政府受判朝廷進獻禮物封裹日左議政六曹判書大司憲知申事一會監檢其中有緣故皆以次官代進大司憲有緣故則執義代進坐於南行代言之下執義有緣故臺長代進無座臺長既非常負例他處則雖政丞坐處皆有坐次獨於方物封裹無坐實爲未便下今禮曹與儀禮詳定所擬議其議曰謹按周禮有上大夫中大夫下大夫上士中士下士凡六等本朝冠服之制一品爲一等二品爲一等三品爲一等四品爲一等五六品爲一等七八九品爲一等以此觀之則本朝一品爲上大夫二品爲中大夫三品爲下大夫四品爲上士五六品爲中士七八九品爲下士矣又按周禮春官三命之位注曰受下大夫之位東巖訂義云三命有位於朝檀弓曰朝不坐宴不與是無位也然則非大夫無位於朝矣議政府受教但曰大司憲有

故執義代進坐於南行不曰執義以下代進者以執義爲下大夫當有坐而掌令以下本無坐不可坐於廟堂又不可與常負雜立故也是故立法之初執義以上有故則臺長不與焉宜從教旨執義以上隨祭從之○禮曹據成吉道監司關啓前此外家墳墓奉祭使其子孫主之一年内正朝寒食端午中秋冬至臘享六名日祭之親盡五六代孫奉祭或非直孫而族孫奉祭未便乞依時俗例一年內正朝寒食端午中秋四名日令其直孫祭之曾祖高祖以上一依 德安陵例每年只行寒食祭從之○刑曹啓大明律文內監守自盜倉庫錢糧條云一貫以下杖八十一貫之上至二貫五百文杖九十至五貫杖一百至四十貫斬今未曉文義一貫之上則雖未滿二貫五百文決杖九十誠爲未便願自今監守自盜一貫之上未滿二貫五百文則以一貫例杖八十常人盜倉庫錢糧一貫之上未滿五貫則亦以一貫例杖七十凡竊盜之人一貫之上未滿十貫則亦以一貫例杖六十其他枉法不枉法坐贓之人亦依此例從之○庚寅司憲掌令鄭淵梁活持平金自怡成念祖等上疏曰臣竊謂事大之禮所係至重故每於進獻禮物乃令所掌之官既已精備又命政府六曹憲司親監封裹使無差誤所以重其事也今者右議政

柳觀刑曹判書權軫吏曹判書許弼禮曹判書申商工曹判書李孟昀
大司憲李之剛兵曹參判崔士康右代言金孟誠等於紙劄封裏之際
擅自出意一積所入粗見一卷而不加詳察以致皺痕之紙雜於其間
大臣承命敬事之意安在倘或不察因仍賁進則豈止柳觀等一身之
愆必將有累於 聖上事大之誠矣豈曰小失伏望 殿下將柳觀等
按律科罪不勝幸甚啟留即命權軫許弼申商李孟昀崔士康金孟誠
等就職○辛卯 上以袞冕群臣朝服拜登極賀表賜使領議政李穆
副使揔制李恪各自繇布衣一領鴨頭綠絲紬衣一領毛冠靴其表曰
天佑瑤圖大統斯正君臨黼辰景命惟新喜溢神人歡均夷夏欽惟
皇帝陛下聰明睿智剛健粹精德協二儀誕受多方之來賀恩覃八表
克開萬世之太平茲值會同之辰益膺福祿之集伏念臣猥將庸質幸
際昌期迹滯東藩雖阻駿奔之列情馳北闕倍彈虎拜之誠方物表曰
聖神繼統克享天心夷夏同懽畢獻方物謹備鞍子二面鞦韆鞞鏡皮
替汗替鞍籠鞭子俱全黃細苧布二十四匹白細苧布黑細麻布各五十
匹滿花席二十張黃花席雜彩花席各一十張人參一百觔豹皮二十
領雜色馬三十匹右件物等名般甚寡製造匪精豈足充旅庭之實聊

以表執壤之奠 中宮進獻禮物白細苧布紅細苧布黑細麻布各二
十匹滿花席一十張黃花席雜彩花席各六張○傳旨兵曹京畿連川
安峽朔寧臨江江原道金化金城淮陽黃海道牛峯講武場今皆革除
許民耕墾○壬辰全羅道水軍都安撫處置使尹得洪使錄事錢丁理
馳啟今九月十二日倭賊船十二艘來泊於西餘鼠島臣率兵船挾攻
追至孤草島東捕賊船一艘斬首五級溺死十六名又令軍官前司直
鄭崇立率兵船四艘追之又捕賊船一艘斬首十三級 上賜錢丁理
衣一襲遣集賢殿修撰權採賜得洪內醞一百六十瓶鞍馬衣一襲仍
命兵曹論功行賞○癸巳視事○命今後經筵進講史官依式入參○
工曹啓銀石產處黃海道谷山平安道泰川成川等各官遣前注簿宋
成立及銀匠一名吹鍊試驗從之○禮曹判書申商等啓臣等謹按三
宮嬪媵之制備載古典所以正內治廣繼嗣不可不重本曹於永樂十
九年狀申受教實爲 宗社萬世之計也惟我 太宗再命攸司爲
殿下欲備壺儀而未就以至于今日切惟 宗社之計不可緩也 太
宗之命不可違也乞依古制妙選仁賢忠孝之裔以成嬪媵之禮以副
臣民之望從之○刑曹啓濟州前司正高順義妻長伊與叔母夫金彥

前妻子金進義奸與金彥進義謀欲殺順義令巫女乙德及家婢小斤
加伊密剪順義髮一握用草作順義身象二各具四肢滿插柚子棘潛
置神堂二處壓襖又令百姓乙奉書十紙曰高順義三日內急死授家
奴恠龍恠龍先授一紙置於獨文菴板子下後受九紙知其欲害順義
不置於指送神堂而藏之草野順義果不日病死事覺効之各人皆伏
按律長伊小斤加伊謀殺夫主皆凌遲處死金進義斬金彥乙德乙奉
絞恠龍謀殺人從而不加功杖一百流三千里從之○甲午禮曹啓謹
按唐長慶三年大常禮院奏郊壇祠祀遇大雨雪廢祭其禮物條件如
後御署祝版於大常寺勅庫收貯玉幣燎柴神酒燎幣醴齊并榛栗脯
醢及應行事燭等令郊社署各牒有司充次祭支用牲牢比附祠令牲
死則埋之例委監察使及禮官於祀所瘞埋菜盛瓜蒞筭蒞應已造成
饌物隨牲瘞埋肯依永爲定式國朝凡大小祭享及期遇故停廢其禮
饌乞依唐制祝版於奉常寺別庫藏貯酒幣榛栗脯醢及燭應緣祭物
皆藏奉常寺以充次祭支用若牲牢菜盛羹俎凡已造之物監察與典
祀官監瘞祠所潔地以爲恒式從之○禮曹啓禡祭儀注當春秋講武
時前期一日
祭前祭一日獻官以下應行事執事官俱清齋一宿前祭一日有司修

除祭所又為瘞坎於神座西北方深取足容物執禮設獻官位於神座
 東南西向執事者位於其後稍南俱西向北上執禮位於獻官之西近北
 西向謁者贊者在南小退俱西向北上又設望瘞位於瘞坎之南北向執事
 者建二旗於南門外其日未行事前獻官以下凡行事執事官俱服武
 服有司奉熊席入設蚩尤神位南向置甲冑弓矢於座側建稍牙於座
 後典祀官率其屬入奠祝版於神位之右有陳幣用白 篚於尊所設香
 爐香合并燭於神位前次設祭器實饌具籩八在左為三行右上豆八
 在右為三行左上簋籩各二在籩豆間盥在左盥在右俎一在籩籩前
 爵三在俎前設象尊二於神座東南北向西上設洗於尊所東南北
 向壘在洗東加勺篚在洗西南肆設諸執事盥洗又於東南北向祭日
 丑前五刻典祀官率其屬入實饌具畢前三刻獻官以下行事執事官
 各服武服執禮率謁者贊者先就拜位重行北向西上四拜訖就位前
 一刻謁者引典祀官大祝齋郎入就拜位重行北向西上立定執禮曰
 四拜贊者傳喝典祀官以下皆四拜訖謁者引諸執事詣盥洗位盥洗
 訖各就位齋郎詣爵洗位洗爵拭爵置於篚奉詣尊所置於坫上謁者
 引獻官入就位西向立執禮曰四拜獻官四拜謁者進獻官之左自有

司謹具請行事執禮曰行奠幣禮謁者引獻官詣盥洗位盥悅訖引獻官詣神位前北向立贊跪執事者一人奉香合一人奉香爐謁者贊三上香執事者奠爐于神位前大祝以幣授獻官獻官執幣獻幣以幣授執事者奠于神位前謁者贊俛伏興引復位小頃執禮曰行初獻禮謁者引獻官詣尊所西向立執尊者酌酒執事者以爵受酒謁者引獻官詣神位前北向立贊跪執事者以爵授獻官獻官執爵獻爵以爵授執事者奠于神位前謁者贊俛伏興小退北向跪大祝進神位之右東向跪讀祝文訖謁者贊俛伏興再拜引復位小頃執禮曰行亞獻禮謁者引獻官詣尊所西向立執尊者酌酒執事者以爵受酒謁者引獻官詣神位前北向立贊跪執事者以爵授獻官獻官執爵獻爵以爵授執事者奠于神位前謁者贊俛伏興小退再拜引復位小頃執禮曰行終獻禮謁者引獻官行禮如亞獻禮引復位執禮曰飲福受胙大祝詣尊所以爵酌福酒執事者持俎進減神位前俎肉謁者引獻官詣飲福位西向立贊跪大祝進獻官之左北向以爵授獻官獻官受爵飲卒爵大祝受虛爵復於坫執事者北向以俎授獻官獻官受俎以授執事者執事者受俎以出謁者贊俛伏興引復位執禮曰再拜在位者皆再拜執禮

曰徹遵豆大祝進徹遵豆執禮曰四拜獻官四拜執禮曰望瘞謁者引
獻官詣望瘞位北向立執禮帥贊者詣望瘞位西向立大祝以篚取祝
版及幣置於坎執禮曰可塞置土半坎謁者進獻官之左白禮畢謁者
引獻官出執禮帥贊者還本位謁者引典祀官及諸執事就拜位立定
執禮曰四拜典祀官以下皆四拜訖謁者引出執禮帥謁者贊者就拜
位四拜而出典祀官率其屬徹禮饌乃退獻官一人會探制執禮一人
贊者大祝謁者各一人司正齋部
二人尊所盥洗位各一人副司正○乙未欽問起居使通事史周京回

自京師啓 皇帝北征班師至榆木川七月十八日崩八月十一日梓

宮還京十五日 皇太子即 皇帝位大赦天下十四日臣等以白衣

白紗帽白帶朝見皇帝以衰服聽政文武官藩邦四夷之使皆以衰服

每日早詣 殯殿哭臨出脫衰服着白衣白紗帽白帶詣 帝前奏事

如常儀二十二日臣等於禮部關受喪服二十三日詣闕已罷哭臨九

月十三日回到十三山驛遇遼東鎮撫劉八兒云朝廷使臣內官一御

史一給事中一行入一奉兩箇詔書向汝國疑是一喪禮詔一登寶位

詔○史周京傳寫北征詔書其詔曰朕恭膺天命統承 皇考太祖高

皇帝鴻業夙夜究治惟懷永圖比以妖虜殘孽辜恩負德梗化不庭乃

以今夏四月四日躬御六師往討之師住應昌前鋒獲虜聲息詢悉孽
虜去秋深知大軍出塞即挾妻孥遠竄山谷圖保殘喘至冬又爲天地
鬼神所譴雨雪連綿積深尋丈其牛羊駝馬斃亡殆盡種落叛散互推
劫奪及今又聞大軍之出日夜奔遁深入漠北窮蹙困迫莫克自支朕
以爲此寇謫詎未可深信經進兵至荅蘭納木兒河窮搜極索直抵白
邱山四望蕭條曠無人迹遂移師東行踰屈裂兒河復涉濤温河擣賊
孽黨閱其巢穴悉以傾蕩耕牧之地盡爲荒墟是用班師還京於戲征
伐國之重事昔高宗之伐鬼方周宣之逐玁狁豈其得已哉然皆爲保
庇生靈規國遠圖是以徂征之師不容不舉今妖氣迅掃沙漠肅清豈
惟朕之威力所及實賴 宗社之靈天心之眷佑永貽四海蒼生無窮
之福故茲詔諭咸使聞知○遠接使刑曹判書權軫工曹判書李孟昉
發行○禮曹啓謹按原廟之制起自西漢皆爲始祖以下立之無爲追
崇之祖立之之文前朝太祖之考曰世祖不立原廟而止祭於陵兩本
國依宋制爲追崇四代別建 永寧殿於 宗廟之西又不廢陵兩之祭
奉先追遠之禮視前代尤有加焉 桓祖則又以 啓聖殿爲原廟而
奉安聖容是既有別廟又有原廟恐非即遠有終之義乞罷啓聖殿

辟容藏於宗簿寺璿源錄在處從之○戶曹啓近年失農各道人物數
多流移就食於全羅慶尚忠清道仍被差役上項流移人物全羅道安
遣敬差官同監司推刷忠清慶尚道令監司推刷自戊戌年以前移來
人內時到處已定役幾戶未定役幾戶其未定役者三丁爲一戶量其
才品於侍衛別牌船軍等軍隨宜定役并其原居鄉吏地名開具啓達
若鄉津驛吏公處奴婢及自願還本者並皆傳驛還本其還本者曾占田
地所收之穀計數納於時居官國庫各還原籍後以其官國庫之穀准數
換給以資其生今後各官守令及各里色掌等依會降教旨嚴加考察
境內人民使不流移從之○丙申 上大閱于東郊文武群臣具甲冑
侍從 上被金甲御壇上百司仍以甲冑行四拜訖左右分立五所將
率各於其廂亦與各司一時行四拜其三軍將帥各率其屬作坐進退
一如其儀 上甚嘉之軍數五千一十六也晝停于都飛淵東議政府
獻壽宗親及資憲以上侍宴嘉靖以下賜宴于帳殿之南○大閱儀注
九月十月中大閱於都外用剛日前期十一日兵曹請大閱承教遂命
將帥揀軍士有司先芟萊除地爲場方一千二百步四出爲和門和門
和又於其內爲步騎軍營域處所分兩陣東西相向中間相去三百

步每五十步立標爲一行凡五行標間相去各五十步爲軍士進止之節又別壇地於北廂南向爲車駕停觀之所前二日忠扈衛設大次及御座於其中又設小次於大次之東隨地之宜王世子次於小次之南近東西向通禮門設王世子以下文武群官拜位於大次之南如常儀前一日將帥及士卒集於壇所禁止喧譁依方色立旗爲和門旗鼓甲仗威儀悉備於壇所大將以下各有統帥如常式將帥先教士衆望聽旋旗指揮之從旗即即晚金鼓動止之節鳴金即止大閱日未明十刻軍士皆嚴備騎徒皆貫甲各爲直陣以相俟將軍及大將各依儀立於旗鼓之下其日未明七刻槌一鼓爲一嚴有司啓開宮殿門及城門未明五刻槌二鼓爲再嚴判通禮啓請中嚴宗室以下文武群官皆具甲冑攸司陳小駕儀仗如常儀未明二刻槌三鼓爲三嚴諸侍衛之官各服其器服車駕動王世子以下文武群官侍衛如常儀車駕至壇所兵曹判書甲冑乘馬奉引入自都壇北和門至小次前下馬入次知通禮引王世子入幕次通禮門分引宗室以下文武群官入大次之南文東武西中心爲頭異位重行俱北向知通禮引王世子真甲冑入就位立定殿下被金甲出小次入大次即座繳扇仗衛如常儀通

贊唱四拜在位者皆四拜中軍將偃旗軍士各於其陣北向四拜舉旗
騎乘馬徒起訖兵曹判書停立於東廂西向仗衛小退以通觀路侍臣
依左右廂立於大次之前東西北上 王世子以下文武九品以上文
東武西在侍臣之外十步重行北上立定吹大角三通中軍將各以鞞
令鼓二軍俱擊鼓有司偃旗騎下馬立徒跪二軍諸帥上護軍以上集
於中軍大將旗鼓之下左廂中軍大將立於旗鼓之東西面諸軍將立
於旗鼓之南北面東上右廂中軍大將立於旗鼓之西東面諸軍將立
於旗鼓之南北面西上以聽誓大將誓曰今行大閱以教人戰進退左
右一如軍法用命有常賞不用命有常刑可不勉之誓訖左右軍司候
各二人振鐸分巡以警衆諸上護軍各以誓辭遍告其所部遂擊鼓有
司舉旗騎上馬徒起皆行及表擊鉦騎徒乃止又擊三鼓有司偃旗騎
下馬徒跪又擊有司舉旗騎上馬徒起騎驟徒趨及表乃止整列位定
東西軍依五行相勝之法互爲陣以應之每變陣各選刀楯之士五十
人挑戰於兩軍之前第一第二挑戰迭爲勇怯之狀第三挑戰爲適均之
勢第四第五挑戰爲勝敗之形五陣畢兩軍俱爲直陣又擊三鼓有司偃
旗騎下馬徒跪又擊鼓舉旗騎上馬徒起騎從徒走左右軍俱至中表

相擬擊而還每退至一行表如前遂復其初九相擬擊皆不得以刃相

十步而止騎士不在此判通禮跪啓大闕禮畢 殿下降坐入小次釋金甲 王

世子還幕次釋甲兵曹承教軍士外百官皆釋甲 殿下還大次即座

進茶床如常儀畢判通禮跪啓請還宮啓訖俛伏興退車駕還宮如來

儀○丁酉視事御經筵○爲 王世子置嘉禮色○咸吉道監司啓敬

依曾降傳旨欲換韃韃馬種令慶源鏡城居人問之彼人有馬者求換

穀食與牛馬然穀食牛馬營中所無請穀食用各官國庫所儲牛馬以

布物買於民間以易種馬從之○賜左議政李原鷹一連六代言田犬

各一○獻陵碑石成賜鞍馬于摠制李蕘賞監造之勞也○禁十二歲

以下處女婚嫁○禮曹啓啓聖殿 聖容移安後位版二蓋扇帳等件

請埋於 永寧殿北潔地從之○咸吉道兵馬都節制使河敬復馳啓

今九月十五日謙真兀狄哈三百餘人突入慶源府高郎岐擄掠秋收

人畜臣即率五百餘騎馳赴與賊四戰擊却之斬首一級射中五十餘

人奪虜馬十四匹鞍十二面及弓箭難物還取擄去男七女二馬七匹

牛十六頭其擄去馬十一匹牛六頭中箭卒七人死者二人中箭馬六

匹死者六匹遣護軍姜仲卿賜敬復內醢二百十瓶鞍馬衣一襲命所

獲虜馬給戰士失馬者○已亥告行講武祭于宗廟是日車駕發晝

停于揚州之綠楊平京樂監司金謙經歷裴桓揚州府使李繩直具朝

服迎謁監司進酒五十瓶分賜于侍衛臣僚及掌軍節制使逮于賤者

命停諸道講武進上知申事郭存中啓曰各道進上已來不可及止夕

次于楓川慶尚道監司李叔取全羅道監司李潑忠清道監司金益精

兵馬節制使趙定成吉道監司鄭招都節制使河敬復黃海道監司成

拵遣人獻方物金謙亦獻方物命代言司分賜各道所進理馬具于隨

駕大小臣僚○欽問起居使通事裴蘊回自京師啓曰登極使臣通政

司叅議彭環禮部郎中李猗以御史中計告使臣內官劉敬行人陳善給

事中假行人○登極使言請預備我青衣○庚子驅連川之加士平與佛老

只山書停于連川南平縣監辛回具朝服迎謁夕次于松折院平京畿

監司進酒五十瓶及饌分賜于扈從臣寮○辛丑驅鐵原之加乙麻古

介書停于珍衣川府使柳議具朝服迎謁監司進酒五十瓶分賜于隨

駕臣僚及其賤者夕次于馬山監司又進清酒一千瓶濁酒二百盆雞

二百猪五十二亦皆分賜遣注書卜孝敬薦禽于宗廟

世宗莊憲大主寶錄卷第二十五

(B)
732.55
4724
[v.4]
no.8
0163666

昭和五年九月十五日印刷
昭和五年九月二十日發行

(景李朝實錄太白山本)

京城帝國大學法文學部

京城府蓬萊町三丁目六十二・三番地

印刷所 朝鮮印刷株式會社

(B)
732.55
4724
[v.4]
no.8